

ማርቆስ ፃፊዳ ኑ ጎዳ ዩሱስ ኪርስቶስ ሚሺራቾ ቃላ ጊዳ ቆፋ

ማርቆስ ሚሺራቾ ቃላይ “ሃይሲ ያሳ ና ዩሱስ ኪርስቶስ ሚሺራቾ ቃላስ ኮይሮ” ጉሳን ደሚስ። ሃይሳ ሃ ሚሺራቾ ቃላዛ ጊዳን ዩሱሲ ኦሳንቻኔ ኢዚ ጎዳተላራ ዲዛይ ጊድ ሸቂዳስ። ጎዳተላይካ ኢዛ ተሚርቲን፣ ዳይዳንላታ ቦላ ዲዛ ዎልቃኒኔ ኢዚ ኣሳ ናጋራ ኣቶ ጊዳይሳን ኤሬቲዳስ። ዩሱሲ “ኣሳ ናጋራ ኣይሌተላፊ ኬሲ ኤካናሰ ታ ሸምፖ ኣሳ ጊሸ ኣላ ኢማናሰ ዩዳ ኣሳ ናይ ታና” ጊዲ ባርካ ዮተዳስ።

ማርቆስ ዩሱሳ ታሪኬ ሸሸዲይ ቆንጩኒኔ ዎልቃይ ኩሚዳ ኦጌራ ጊዲሺን ኢዚ ተሸ ሂሰቲ ፃሊዳይ ዩሱሳ ቃላኔ ኢዛ ተሚርቲዛ ጊዳንታ ኢዚ ኦሊዳ ጊታ ማላታ ኦሶታ። ኢዚ ዓማቂዛ ዮሃኒሳ ጊሸ፣ ዩሱሳ ፃንቃቲ ጊሸኔ ኢዚ ኤኪዳ ሜቶዛ ጊሸ ቃንላራ ዮተዳፔ ጉዩን ዩሱሲ ታማርሲዳ ተሚርቲዛ ጊሸኔ ኢዚ ሃርጋንቻታ ፓሊዳይሳ ቢርሽ ዮቴሰ። ዩሱሳ ካሊዛይቲ ጉዩፔ ዩሱሳ ሎዔሊ ኤሪ ኤሪ ቢዳ ማላ ዩሱሳራ ኤቁቲዛይቲ ቃሴ ዩሱሳ ካሴፔ ኣሊ ኢዳ ኢዳ ቢዳ። ማፃፋሰ ወርሴላ ሸምፖቲ ዩሱሲ ቢታ ቦላ ዳዒዳ ወርሴላ ላይላን ወርሴላ ሳሚንታን ፖሌቲዳ ኦሶታ፣ ሃራፔካ ኢዛ ካቁቲላ ጊሸኔ ኢዛ ዳንላ ጊሸ ዮቴቲሰ።

ማርቆስ ሚሺራቾ ቃላስ ወርሴላን ዲዛ ናምዑ ኪፊሌቲ ኢሲ ኢሲ ማፃፋታን ፃላላ ዳቴሰ።

- ሃ ማፃፋይ ኦይኪዳ ኩሚላ ቆፋ
- ሚሺራቾ ቃላስ ኮይሮ ደሚሳ 1:1-13
- ዩሱሲ ባ ኦሶ ኮይሮ ጋሊላን ደሚዳሰ 1:14-9:50
- ዩሩሳላሚን ዩሱሳ ኦሶ 10:1-52
- ዩሩሳላሚኒኔ ሃ ሄራን ወርሴላ ሳሚንታን ዩሱሳ ጋኪዳ ሜቶ 11:1-15:47
- ሃይቆፔ ጎዳ ዳንሊ 16:1-8
- ሃይቆፔ ዳንዲዳ ጎዳ ቆንጩሊኔ ፑዴ ሳሎ ቡስ 16:9-20

ፃግቁዛ የሃኒሳ ማርካቴል
(ማቶ 3:1-12፤ ሉቃ 3:1-18፤ ዮሃ 1:19-28)

1 ያሳ ና ዩሱስ ከርሰቶሳ ኮይሮ ሚሺራቸይ ሃይሳ፤ * 2 ናቤ ኢሳያሳ ባጋራ

“ሄኮ ኔስ ኦጌ ሎዔላናዴ ታ ከታናዴ ኔፔ ሲንላራ ዩዳና። * ”

3 “ሳዳስ ኦጌ ጊሊሲቴ፤ ኢዚ ባና ኦጌ ሱሪሲዲ ኦሊቴ”

ጊሼ ባዞ ቢታን ዋሲዛ ጊሪስ” ጌቴቲ ፃፊቲዳስ። *

4 ሄሳሉካ ፃግቁዛ የሃኒሲ ኦሳ ፃግቁሽኔ “ኢንቴ ናጋራፔ ሲሚዲ ፃግቁቲቴ፣ ያሲ ኢንቴ ናጋራ ኦቶ ጋና” ጊ ኦዋጂሽ ባዞራ ኬዚ ዋጂዳስ። 5 የሁዳ ዳሬይ ኩሜል ዩሩሳላሜ ኦሳይ ዉሪ የሃኒሳኮ ቢ ቢዲ ባ ናጋራ ናጋራ ፓዲ ፓዲ ዮርዳኖሴ ሻፋን የሃኒሳ ኩሽን ፃግቁቲዳስ። 6 ሄ ዋዴ የሃኒሲ ማይዲዛይ ጋሜላ ኢሲኬፔ ኦሴቲዳ ማይያ፤ ቃሴ ባ ያሳን ተ ዳሮ ጊዳስ። ኢዚ ሚዛ ቁማይ ቦሌኔ ዳጌራ ኤሳ። * 7 ኢዚ “ታኒ ሆካዳ ኢዛ ጫማ ቃሾ ቢርሻናስ ቤሶንታዳይ፣ ታፔ ኦጂዛዳይ ታፔ ጉዩራ ያና። 8 ታኒ ኢንቴና ሃላን ፃግቆይስ ኢዚ ጊዲኮ ኢንቴና ዲሎ ኢያናን ፃግቆና” ጊዲ ሳባኪዳስ።

ዩሱሳ ፃግቁቴሲኔ ፓጩቴል

9 ሄ ዋዴ ዩሱሲ ጋሊላ ጊዶን ዲዛ ናዚሬቴ ጌቴቲዛ ካታማይፔ ዮርዳኖሴ ሻፋ ዩዲ የሃኒሳ ኩሽን ፃግቁቲዳስ። 10 ዩሱሲ ፃግቁቲዲ ሃላፊ ኬዚዳ ማላ ሳሎይ ዶዩቲን ዲሎ ኢያናይ ኢዛ ቦላ ሃራጴ ካሮ ሚሳቲዲ ዋጂሽን ቤዩዳስ። 11 ቃሴካ “ታ ዶሲዛ ናይ ኔና፣ ኔናን ታ ኡፋዩታይስ” ጊዛ ቃላ ጊሪሲ ፑዴ ሳሎፔ ሴቴቲዳስ። *

12 ሄራካ ዲሎ ኢያናይ ኢዛ ዲጌ ባዞ ካሌላ ኤፊዳስ። 13 ሄን ባዞንካ ኦይዲ ታሙ ጋላስ ጋካናስ ፃላዔራ ፓጩቴሽ ጋምዒዳስ። ዶባታራ ኢሲፌ ዳዒዳስ። ከታንቻቲካ ኢዛ ማዲዳ።

* 1:1 ኢሲ ኢሲ ጌሻ ማፃፋታን ያሳ ና ጊዛ ቃላዚ ፃፊቲቤና። * 1:2 ሚል 3:1 * 1:3 ኢሳ 40:3 † 1:6 ያሳ ጉሲ ኢሲ ኢሲ ጋዎ ኦሳታ ቃላራ ዳባ ጌቴቲስ። * 1:6 2ካዎ 1:8 * 1:11 ሜዴ 22:2፤ ማዛ 2:7፤ ኢሳ 42:1፤ ማቶ 3:17፤ 12:18፤ ማር 9:7፤ ሉቃ 3:22

ዩሱሲ ሞሌ ኦይኪዛ ኦይዱ አሳታ ባና ካላና ማላ ዪይጊዴስ 14-15 ዮሃንሲ ቃሾ ከሌ ጌሊዳይሳፊ ጉዬ ዩሱሲ ያሳ ሚሺራቾ ቃላ ሳባኪሼ ጌዴ ጋሊላ ቢዲ “ዎዴይ ጋኪዴስ፤ ያሳ ካዎቲሌ ማቲዴስ፤ ናጋራፔ ሲሚቲ፣ ሚሺራቾ ቃላን አማንቲ” ጊዲ ሳባኪዴስ።

16 ዩሱሲ ጋሊላ አባ አቻራ አዲን ሲሞናይኔ ኢዛ አሻ አንዲራሲ ሞሌ ኦይኪዛይታ ጊዲዳ ጊሽ ኢሰቲ ሞሌ ኦይኪዛ ጊቲ አባን ዩጊሽን ቤዪዴስ። 17 ዩሱሲ ኢስታ “ሃ ዪቲ! ታና ካሊቲ፤ አንቲ ሞሌ ኦይኪ ሽሽዛ ማላ ታ አንቲና አሰ ኦይኪዛይታ ኦላና” ጊዴስ። 18 ኢሰቲ ሄራካ ሞሌ ጊቲዛ ዩጊ አጊዲ ዩሱሳ ካሊዲ።

19 ጉሌ ጌዴ ሲንሌ አዲዲ ዛቢዶሳ ና ያቆቤይኔ ኢዛ አሻ ዮሃንሲ ዎጎሎን ኡቲዲ ሞሌ ጊቲ ጊጊሲሽን ቤዪዲኔ ሄራካ ኢስታ ዪይጊዴስ። 20 ኢሰቲካ ባ አዎ ዛቢዶሳሰ ቃፃሬቲዲ አሌዛ አሳታራ ኢሲፌ ዎጎሎዛ ጊዶን አጊዲ ዩሱሳ ካሊ ቢዲ።

ቱና አያናይ ኢዛ ቦላ ዲዛዴ ዩሱሲ ፓሌዴስ

21 ሄፔካ ቁፊርናሆሚ ቢዲ። ሄራካ ዩሱሲ አይሁዳታ ሳሞባታ ጋላስ አይሁዳታ ዎሳ ከሌ ጌሊዲ ታማርሶ ኦይኪዴስ። † 22 ፃፊታ ማላ ጊዶንታ ጎዳቲላራ ዲዛ አሳ ማላ ኢዚ ታማርሲን አሳይ ወሪ ኢዛ ቲሚርቲዛን ማላሌቲዴስ።

23 ሄ ዎዴ አይሁዳታ ዎሳ ከላን ዲዛ ቱና አያናይ ኢዛ ቦላ ዲዛ ኢሲ አዴይ 24 “ናዚሬቲ ዩሱሳ ኔ ኑፔ አዚ ኮያይ? ኑና ዳይሳና ያዲ? ኔ ኦናኮኔ ታ ኔና ኤራይስ፤ ኔኒ ያሳ ጌሻዛ” ጊዲ ዋሲዴስ።

25 ዩሱአሲካ ቱና አያናዛ “ጮቡ ጋዳ ኢዛፔ ከዛ!” ጊዲ ሃንቂዴስ።

26 ቱና አያናይ አዴዛ ጌንዴርሲዲ ኢዚ ቃከቲሽን ኢዛፔ ዋሲሾ ከዚዴስ። 27 ዴሬይ ወሪ “አሶ ሃይሲ አዛ ፓላ? ሃይሲ ጎዳቲላራ ዲዛ ኦራላ ቲሚርቲ፤ ቱና አያናታካ አዛዜስ፤ ኢሰቲካ ኢዛስ አዛዜቲቲስ” ጊ ማላሌቲሾ አሳይ ባ ጊዶን ኢሶይ አሳ ኦይሾቾ ኦይኪዴስ።

28 ሄራካ ኢዛ ኦሶ ዎሬይ ኩሜላ ጋሊላ ዩሾን ዲዛ ዴሬ ኡባን ሲዩቲዴስ።

ዩሱሲ ዳር ሃርጋንቻታ ፓሌዴስ

† 1:21 አይሁዳታ ዎሳ ከሌ ጊዛይሳ አማራሶ ቃላን “ሚኩራቢ” ጌቲቲስ።

29 አይሁዳታ ዋሳ ከላፌ ከዚያ ማላ ያቆቤራኔ የሃረሳራ ኢሲፌ ጌዴ ሲሞናሶኔ እንዲራሳሶ ጌሊዳ። 30 ሄ ጌሊዳ ማላ ሲሞና ሶሎቴያ ሚሻ ሃርጌ ሳኬታዳ አቺዳይሳ ኢዛሰ የቲዳ። 31 ሄሳ ጊሽ ዩሱሲ ኢዚኮ ሸቁዲ ኢዚ ኩሼ ኦይኪዲ ዳንሊዳሰ። ሚሻይ አገን ኢዛ ዳንዳዳ ኢሰታ ሞካዲሰ።

32 አዋ አርሼይ ወሊዳፔ ጉዬ ጋዴይ ቋሚሺን አሳይ ሃርጋንቻታኔ ዳይዳንሊ ኦይኪዳ አሳ ወርሲ ዩሱሳኮ ኤኪ ዩዳሰ።

33 ሄ ካታማዩን ዲዛ አሳይ ወሪ ከላ ካሪን ሸቁዳሰ። 34 ኢዚካ ዲማ ዲማ ሃርጌን ሳኬቲዳይታ ዳርታ ፓሊዳሰ። ዳር ዳይዳንሳታካ ኬሲዳሰ። ጊዶ አቲን ዳይዳንሳቲ ዩሱሲ ኦናኮኔ ኤሪዛ ጊሽ ዳይዳንሳቲ ሃሳያና ማላ ዩሱሲ ኮይቤና።

ዩሱሲ ጋሊላን ሚሺራቾ ቃላ ታማርሲዳሰ

35 ባዞይ ዘዖንታ ማላዶ ዎንታራ ዩሱሲ ዳንዲዲ ኢሲ አሲ ባይንዳሶ ቢዲ ሄን ዋሳ ኦይኪዳሰ። 36 ሲሞኒኔ ኢዛራ ዲዛይቲ ዩሱሳ ኮያና ከዚ ቢዳ። 37 ኢሰቲ ኢዛ ዳሚዲ አሲ ወሪ ኔና ኮሻን ዳሰ ጊዳ።

38 ዩሱሲካ “ታ ዩዳይ ታማርሳናሰ ጊዲዳ ጊሽ አኔ ሚሺራቾ ቃላ የታናሰ ማታን ዲዛ ጉታታ ሶሰ” ጊዳሰ።

39 ሄሳ ጊሽ አይሁዳታ ዋሳ ከላን ጌሊ ጌሊ ሳባኪሼኔ ዳይዳንሊ ኬሲሼ ጋሊላ ኩሜላን ዩዩዳሰ።

ዩሱሲ እንቺራቻ ሃርጊዛዴ ፓሊዳሰ

40 ኢሲ እንቺራቻ ሃርጊዛዴይ ዩሱሳኮ ሸቁዲኔ ኢዛ ሲንላን ጉልባቲዲ “ኔ ሼኔ ጊዲኮ ኔ ታና ፓላና ዳንዳያሳ” ጊ ዎሲዳሰ።

§ 41 ዩሱሲካ አዳዛሰ ሚሼቲዲ ባ ኩሼ ዩዲ ኢዛ ሶቺዲኔ “ታ ኔ ፓፃና ማላ ኮያይሰ፤ ፓፃ!” ጊዳሰ።

42 ሄራካ አዳዛ እንቺራቻ ሃርጌይ አገን፣ አዳዚ ፓፂዳሰ።

43-44 ዩሱሲካ አዳዛሰ “አናሰካ ሃይሳ ኔ ሃሳዮንታ ማላ ናጌታ፤ ጊዶ አቲን ባዳ ቁሴሰ ኔና ቤሳ። ዴሬዛሰ ማርካ ጊዳና ማላ ኔ ፓፂዳይሳሰ ሙሴይ አዛዚዳ ያርሾዛ ሸሻ” ጊዲ ከሄ ሚንላ የቲዳሰ።

45 ጊዶ አቲን አዳዚ ከዚ ቢዲ ባ ቢዳ ኡባሶን ዎሪ ዳርሲ ቋርጨዳሰ። ሄሳ ጌዶን ዩሱሲ አይ ካታማንካ ቆንጨራ

§ 1:40 ንቺራቻ ጌሻ ማፃፋይ ቆንጨሲዛ ማላ አሳቴላ ሶላ ሶላራ ጋልባን ከዚዛ ዲማ ዲማ ሃርጌታ ኡባ ቤሴሰ።

ጌላናስ ዳንዳይቤና። ሄሳፌ ዳንዳይሳን ካታማፔ ካሬራ እሲ ባይንዳሶን ዲስ ኦይኪዳስ። አሳይ ጊዲኮ ዲማ ዲማሶፔካ ኢዛኮ ዪዳስ።

2

ዩሱሲ ቶሆ ሲላ አዳዛ ፓሊዳስ
(ማቶ 9:1-8፤ ሉቃ 5:17-26)

1 ጉላ ጋላሳፌ ጉዬ “ዩሱሲ ቂፊርናሆሜ ሲሚዲ ሶን ዳስ” ጊዛ ዋሬ አሳይ ሲዪዳስ። 2 ሄሳ ጊሽ ኮላራ ካሬራ ኡተዛሶይ ጳያና ጋካናስ ዳር ዳሬይ ሸቂዳስ። ኢዚካ ያሳ ቃላ አሳስ ሳባኪዳስ። 3 ኦይዱ አስ ዳይቲ ኢሲ ቶሆይ ሲሊዳ አስ ቶኪዲ ኢዛኮ ኤሂዳ። 4 አሳ ዳርቴላፌ ዳንዳይሳን ዩሱሲ ዲዛሶ ጋላናስ ዳንዳዮንታ ጊሽ ዩሱሲ ዲዛ ጊናራ ካራ ቃሪዲ ሃርጋንቻዛ ኢዚ ኢቺዳ ሃላራ ዩሱሳ ሲንሐ ዲጌ ዋሊዳ። * 5 ዩሱሲ አሳታ አማኖ ቤዪዲ ቶሆይ ሲሊዳ አዳዛ “ታ ናዙ! ኔ ናጋራይ አቶ ጌቴቲዳስ” ጊዳስ።

6-7 ሄን ጋዳን ኡቲዳ ኢሲ ኢሲ ሙሴ ዋጋ ያፌቲ ባ ዋዝናራ ሃይሲ አዳዚ ዋስቲ ሃይሳሶ ጊዜ? “ያሳ ሶላ ጫሻ ቃላ ሃሳዬስ። ኢሲ ያሳፌ አቲን ናጋራ ማራና ዳንዳይዛይ ኦኔ?” ጊዲ ቆፒዳ።

8 ዩሱሲ ሄራካ ኢስቲ ባ ዋዝናን ቆፒዳይሳ ባ አያናን ኤሪዲ “አንቲ ዋስቲ ሃይሳሶ ቆፒቲ? 9 ቶሆይ ሲሊዳ አዳዛ፤ ‘ኔ ናጋራይ አቶ ጌቴቲዳስ’ ጉሳፌኔ ‘ዳንዳዳ ኔ ሃላ ቶካዳ ባ ጉሳፌ አዋይሲ ማቲዜ?’ 10 ጊደ አቲን አሳ ናስ ቢታ ሶላን ናጋራ ማራና ጎዳቴሌ ዲዛይሳ አንቲ ኤራና ማላ” ጊዲ ቶሆ ሲላ አዳዛ፤ 11 “ዳንዳዳ ኔ ቶኬታ ዪዳ ሃላ ቶካዳ ኔሶ ባ” ጊዳስ።

12 ኢዚካ ዳንዳዲ አሳይ ወሪ ቤዪሺን ሃላ ቶኪዲ ቢዳስ። ሄን ጋዳን ዲዛ አሳይ ወሪ ሃኖዛን ማላሌቲዲ “ካሴ ሃይሳ ማላይ ሃኒን ቤይሶኮ” ጊዲ ያሴ ጋላቲዳስ።

ዩሱሲ ለዌ ያይጊዳስ
(ማቶ 9:9-13፤ ሉቃ 5:27-32)

13 ቃሴካ ዩሱሲ ጋሊላ አባ ላንቄ ቢዳስ። ዳር ዳሬይ ኢዛኮ ዪን ኢዚካ ዪዳ አሳ ታማርሲዳስ። 14 ኢዚ ኦኔራ አቋ ቢሺን ኢልፊዮሳ ና ለዌይ ቃሪፃ ሸሺዛሶን ኡቲዳይሳ ቤዪዲ “ሃያ ታና ካላ” ጊዳስ። ኢዚካ ዳንዳዲ ዩሱሳ ካሊዳስ።

* 2:4 ሃላራ ጊዛይሳ ኢሲ ኢሲ ባጋ ጋዋሶ ቃላራ ዛጸራ ጌቴስ።

15 ሄሳፌ ጉዬ ለዌ ሶን ካላ ማዳን ኡቲ ዲሺን ቃራፃ ሺሺዛ ዳር አሳቲኔ ናጋራንቻቲ ኢዛራ ካሊ ዪዳ ገሽ ኢስቲ ዩሱሳራኔ ኢዛ ካሊዛይታራ ኢሲፌ ማዳን ኡቲዳ። 16 ፋርሳዌታ ባጋፌ ገዲዳ ሙሴ ዋጋ ታማርሲዛይቲ ዩሱሲ ናጋራንቻታራኔ ቃራፃ ሺሺዛይታራ ሚሺን ቤዪዲ ኢዛ ካሊዛይታ “ቃራፃ ቃንዲሲዛይታራኔ ናጋራንቻታራ አዛስ ሚዜ?” ገዲ ኦይቺዳ።

17 ዩሱሲካ ኢስቲ ገዛይሳ ሲይዲ “አኪሜይ ሃርጋንቻታስ ኮሽሶ አቲን ሃርጎንታይታስ ገዳና። ታካ ናጋራንቻታ ጃይጋናስ ያዲሰ አቲን ጂሎታ ጃይጋናስ ያቤኬ” ገዳሰ።

ጾማ ገሽ ሺቂዳ ኦይሾ
(ማቶ 9:14-17፤ ሉቃ 5:33-39)

18 ዮሃንሳ ካሊዛይቲኔ ፋርሳዌቲ ጾማ ጾማቴሰ። ኢሲ ኢሲ አሳቲ ዩሱሳኮ ዪዲ “ዮሃንሳ ካሊዛይቲኔ ፋርሳዌታ ካሊዛይቲ ጾማቴሰ ሺን ኔና ካሊዛይቲ አዛስ ጾማቴኔ?” ገ ኦይቺዳ።

19 ዩሱሲካ ኢስታስ “ሚሺራይ ኢስታራ ዲሺን ሚሺራ ላጌቲ ጾሚ ኤሪዞ? ሚሺራይ ኢስታራ ዲሺን ጾሚ ኤሬቴና። 20 ሚሺራይ ኢስታፊ ኤኬታና ዋዳይ ያና። ሄ ዋዳ ኢስቲ ጾማና።

21 “ጋልዓ ማይያ ቦላ ኦራላ ዋሶ ዋሊ ሲኪዛዳይ ኦኒካ ዳና፤ ሄሳሶ ኦሊኮ ኦራላዚ ጋልዓ ዳኪ ዳኪ ዩጌሰ፤ ዳኬላይካ ካሴፔ ጌዳ አጂ ኢቴሰ። 22 ሄሳሶካ ኦራላ ዋይኔ ጫጃ ጋልዓ ሉካሞን ዋሊዛዳይ ዳና። ዋሊዛ ገዲኮ ዋይኔ ጫጃዚ ጋልዓ ሉካሞዛ ጱሴሰ፤ ዋይኔ ጫጃዚኔ ሉካሞዚ ናምዓይ ሞሬቴቴሰ። ሄሳ ገሽ ኦራላ ዋይኔ ጫጃይ ዳናሰ ቤሲዛይ ኦራላ ሉካሞና” ገዳሰ።

ሳምባታ ገሽ ሺቂዳ ኦይሾ
(ማቶ 12:1-8፤ ሉቃ 6:1-5)

23 ዩሱሲ አይሁዳታ ሳምባታ ጋላስ ገሰቲ ቲያ ገደራ አጂሺን ኢዛ ካሊዛይቲ ኢዛራ ኢሲፌ ቢሼ ቲያ ፀጶ ኦይኪዳ። *

24 ፋርሳዌቲ “ኔና ካሊዛይቲ ሳምባታ ጋላስ ዲጌቲዳ ሚሽ አዛስ ኦሊዞ?” ገዲ ዩሱሳ ኦይቺዳ።

25 ኢዚካ ኢስታስ “ዳወቴይ ጋፊዲ ሚዛ ሚሽ ኮይዳ ዋዳ ኢዛራ ኢሲፌ ዲዛይታራ ኢዚ ኦሊዳይሳ ናቤቢቤኬቲ? *

26 አቢያታሪይ ቄሴታ ሃላቃቴላን ዲሺን ኢዚ ያሳ ኮሌ ጌሊዲ

* 2:23 ዛሬ 23:25 * 2:25 1ሳሜ 21:1-6

ቄሴት ፃላላ ማናሰ በሲዛ ዲማ ካላ ባሲ ሚዲኔ ባናራ ዲዛይታስ ኢሚዴስ” ጌዴስ። *

27 ቃሴካ ዩሱሲ ኢስታስ “ሳምባታይ ኣሳስ ሜዴቲዴስ ኣቲን ኣሲ ሳምባታስ ሜዴቲቤና። 28 ሄሳ ጊሽ ታ ኣሳ ናይ ሳምባታ ጎዳ” ጌዴስ።

3

ዩሱሲ ኩሼይ ሲሊዳ ኣዳዛ ፓሊዴስ
(ማቶ 12:9-14፤ ሉቃ 6:6-11)

1 ሃራ ጋላስ ዩሱሲ ኣይሁዳ ዋሳ ኬጼ ጌሊዴስ። ሄንካ ኩሼይ ሲሊዳዴይ ዴስ። 2 ዩሱሳ ሞታናስ ጋሶ ኮዪዛ ኣሳቲ ኢዚ ኣይሁዳታ ሳምባታ ጋላስ ፓላናኮኔ ጌዲ ፓሊሺን ቤያና ኮይዳ።

3 ኢዚካ ኩሼይ ሲሊዳ ኣዳዛ “ሄን ሸቂ ኡቲዳ ኣሳ ሲንፋን ዴንዳ ኤቃ” ጌዴስ። 4 ሄሳፌ ጉዬ ዩሱሲ ኣሳ “ሳምባታ ጋላስ ቤሲዛይ ሎፖ ኦሶዬ? ኢታ ኦሶ? ኣሳ ሼምፖ ኣሾዬ? ዋይኮ ሼምፖ ዋዶ?” ጌዲ ኦይቸዴስ። ኢስቲካ ጮፀ ጌዳ።

5 ኢስታ ዋዝና ሹቻቲፋን ሚሼቲዲ ኢዛ ጌዶሊዲ ዩዩ ኣዲ ኤቂዳ ኣሳ ሃንቆራ ዪሊዲ ኣዳዛ “ኔ ኩሼዛ ፒዲሳ!” ጌዴስ። ኣዳዚካ ባ ኩሼ ፒዲሲን ኩሼዚ ሙሌራ ፓሊዴስ። 6 ፋርሳዌቲ ኬዚ ቢዲ ኢዛ ዋስቲ ዳይሳናኮኔ ሄርዶሳ ባጋ ጌዲዳ ኣሳታራ ዘሬቲዳ።

ኣባ ላንቄን ዳር ኣሳይ ዩሱሳኮ ሸቂዴስ

7 ዩሱሲ ባና ካሊዛይታራ ኣባኮ ቢዴስ። ጋሊላፔኔ ዩሁዳፔ ዩዳ ዳር ዴሬይ ኢዛ ካሊዴስ። 8 ኢዚ ኦሊዛይሳ ሲይዲ ኣሳይ ዩሁዳፔ፣ ዩሩሳላሚፔ፣ ኤዶሚፔ፣ ዮርዳኖሴ ፒንፋን ዲዛ ዴሬታፔ ቃሴ ዪርሴፔኔ ሲዶና ሄራፔ ኢዛኮ ዩዴስ። 9 ኣሳይ ዳሪዳ ጊሽ ኢዛ ኡንዔሶንታ ማላ ጉሳ ዋጎሎ ኢስቲ ጊሊሳና ማላ ባና ካሊዛይታ ኣዛዚዴስ። 10 ኢዚ ዳር ሃርጋንቻታ ፓሊዳ ጊሽ ሳኮይ ዋይሲዛይቲ ዉሪ ኢዛ ባ ኩሼራ ቦቻናስ ዳፊቲዳ። * 11 ቱና ኣያናቲካ ዩሱሳ ቤዩዳ ማላ ኢዛ ሲንፋን ኩንዲዲ “ኔኔ ፆሳ ና” ጌዲ ዋሲዳ።

12 ጊዶ ኣቲን ኢዚ ኦናኮኔ ቱና ኣያናቲ ቆንጩሶንታ ማላ ኬሂፔ ሃንቂዴስ።

* 2:26 ሉዌ 24:9 * 3:10 ማር 4:1፤ ሉቃ 5:1-3

ዩሱሲ ባና ካሊዛ ታማኔ ናምዓታ ደሪዳስ

(ማቶ 10:1-4፤ ሉቃ 6:12-16)

13 ዩሱሲ ፑዴ ዙማ ቦላ ኬዚዲ ባ ኮዩዛይታ ባኮ ያና ማላ ያይገዴስ፤ ኢስቲካ ኢዛኮ ዩዳ። 14 ኢዛራ ኢሲፌ ገዳና ማላኔ ሰባካናስ ዩዳና ማላ ታማኔ ናምዓታ “ሃዋሬታ” ገ ሱንሊዳስ። 15 አሳፔ ዳይዳንላታ ኬሳና ማላ ኢስታስ ጎዳቴላ ኢሚዳስ።

16 ኢዚ ሱንሊዳ ታማኔ ናምዓታ ሱንሊ ሃይሳፌ ካሊዛይሳ፤ ጳፀርሳ ጌቴቲዳ ሲሞና፤ 17 ቢዖሪኔጌሴ ዋይኮ ዳዳ ናይታ ጌቴቲዳ ዛቢዳሳ ናይታ ያቆቤኔ ዮሃንሳ፤ 18 ኢንዲራሳ፤ ፒሊጶሳ፤ ባርቴሌሞሳ፤ ማቶሳ፤ ቶማሳ፤ ኢልጆዮሳ ና ያቆቤ፤ ታዶሳ፤ ባ ባጋስ ሚሼቲዛ ሲሞና፤ * 19 ዩሱሳ አላ ኢሚዳ አስቆሮንቶ ዩሁዳ።

ዩሱሳኔ በዔሊዜቡላ

(ማቶ 12:22-32፤ ሉቃ 11:14-23፤ 12:10)

20 ሂሳፌ ጉዬ ዩሱሲ ኢሲ ሶ ጌሊዳስ። ኢዚኔ ኢዛ ካሊዛይቲ ካላ ማና ዋይይ ኢስታስ ጳያና ጋካናስ ዳሬይ ቃሴካ ዳሪ ሸቂዳስ። 21 ኢዛ ሃኖታ ሲዩዳ ኢዛ ዳቦቲ “ጎዮንታ አጌና” ገዲ ባናራ ኤኪ ባናስ ኢዚ ዲዛሶ ጋኪዳ።

22 ዩሩሳላሜፔ ዩዳ ፃፊቲካ “በዔሊዜቡላ ጌቴቲዛ ዳይዳንላታ ሃላቃይ ኢዛ ቦላ ዳስ። ኢዚ ዳይዳንላታ ኬሲዛይ ዳይዳንላታ ሃላቃ ዋልቃንኮ!” ገዳ።

23 ኢዚካ ኢስታ ያይገዲ ለሚሶራ “ፃላዔይ አሳፔ ፃላዔ ዋስቲ ኬሳኔ? 24 ባ ገደን ሻኮይ ዲዛ ካዋቴላ ሚናናስ ዳንዳዬና። 25 ኢሲ ኬላ አሲካ ባ ገደን ሻኬቲኮ ኤቃናስ ዳንዳዬና። 26 ሃሳቶካ ፃላዔይ ባ ጋራሳን ኢሶይ ኢሳራ ሻኬቲኮኔ ኢፃቲኮ ሚኒ ኤቃናስ ዳንዳዬና። ሂሲካ ኢዛስ ዉርሴላ ገዳና።

27 “ሃሳ ጌደን ኢሳዳይ ኮይሮቲዲ ዋልቃማ አስ ቃቾንታ ዲሼ ዋልቃማዛሶ ጌላናሲኔ ኢዛ ሚሼ ቦንቃናስ ዳንዳዬና፤ ኢዛ አቆ ቦንቃናስ ዳንዳይቲዛይ ዋልቃማዛ ቃቾኮ ፃላላ።

28 “ታ ኢንቴስ ቱሙ ጋይስ፤ አሳ ናይታስ ናጋራይኔ ጫሺ ዉሪ ማሬታና። 29 ገደ አቲን ፂሎ አያና ቦላ ጫሻ ቃላ ሃሳዩዛ አሳ ኡባስ ሜርናስ ናጋራ አጮ ገዳና አቲን ማሬቴና” ገዳስ። *

* 3:18 ባ ባጋስ ሚሼቲዛ፤ ሲሞና ሃይሲ ሃ ሱንላይ ጉጃቲዳይ ኢሲ ኢሲ አሳቲ ኢዚ ባ ሃይማኖቱዛስ ሚሼቲዛ ገሻሳ ጌቴስ። ሃራይቲ ቃሴ ኢዚ ኢሲ አሳ አይሉቴላፌ ዋዚዛ ኢሲ ዲርጂቴ ገደን ዲዛ ገሻሳ ጌቴስ። * 3:29 ሉቃ 12:10

30 ሄሳ ኢዚ ጊዳይ ኢስቲ ኢዛ “ኔ ቦላ ቱና ኣያናይ ዳስ” ጊዳ ገሻሳ።

ዩሱሳ ኣዩዮን ኢዛ ኢሻታ
(ማቶ 12:46-50፤ ሉቃ 8:19-21)

31 ሄሳፊ ጉዬ ኢዛ ኣዩዮን ኢዛ ኢሻቲ ካሬ ዩ ኤቁዲኔ ኣሴ ኢዛኮ ከቲ ዓይጊሲዳ። 32 ኢዛ ዩዩ ኣጂ ኡቲዳ ዳር ኣሳይ “ሄኮ ኔ ኣዩዮን ኔ ኢሻቲ ካሬን ኤቁዲ ኔና ኮዩቲስ” ጊዳ።

33 ኢዚካ ዛሪዲ “ታ ኣያ ኦኔ? ታ ኢሻቲ ኦናንቲ?” ጊዳስ።

34 ኢዛ ዩዩ ኡቲዳ ኣሳኮ ያሊዲ “ታ ኣዩዮን ታ ኢሻቲ ሃይታንታኮ!

35 ያሳ ሸኔ ኦሊዛይ ዉሪ ኢዚ ታ ኢሻ፣ ታ ሚኾኔ ታ ኣዮ” ጊዳስ።

4

ዜሬላ ዜሪዛዳ ለሚሶ
(ማቶ 13:1-9፤ ሉቃ 8:4-8)

1 ቃሴ ዩሱሲ ሃሪ ዎዳ ኣባ ኣቻን ታማርሶ ኦይኪዳስ። ኢዛኮ ከሂ ዳር ዳሬይ ሸቁዳ ገሽ ኣባ ጊዳን ዲዛ ዎጎሎ ዲዛሪን ጌሊዲ ኡቲዳስ፤ ኣሳይካ ዉሪ ኣባ ኣቻን ሸቁዳስ። * 2 ኢዚካ ዳር ዮዖታ ለሚሶ ሂዘጊ ታማርሲዳስ። 3 “ሲዩቲ! ኢሳዳይ ዜሬላ ዜሪናስ ከዚዳስ። 4 ኢዚ ዜሪሸን ኢሲ ኢሲ ዜሬላ ኦኔ ቦላ ዎጂዳስ። ኦኔ ቦላ ዎጂዳ ዜሬላ ካፎቲ ማዲ ሚዳ። 5 ባገይ ማላ ቢታን ዎጂዳስ። ሄ ቢታይ ማላ ጊዲዳ ገሽ ሄሪካ ጫሪዳስ። 6 ጊዳ ኣቲን ኣዎ ኣርሼይ ከዚዳ ማላ ሹሊዲ ዓጳ ዩዳንታ ገሽ ማሊዳስ። 7 ቃሴ ኢሲ ዜሬላ ኣኹንላ ጊዳን ዎጂዳስ፤ ኣኹንላይካ ዲጩዲ ጩሊዳ ገሽ ኣይፊቤና። 8 ሃሪ ዜሬላ ቃሴ ሎዖ ኦርዳ ቢታ ቦላ ዎጂዳ ገሽ ጫሪዲ ዲጩዳስ፤ ኣይፊካ ኣይፊዳስ፤ ኢሶይ ሄሹ ታሙ፣ ኢሶይ ቃሴ ኡሱፑን ታሙ፣ ኢሶይ ቃሴ ያቱ ኣይፊዳስ።”

9 ዩሱሲ ቃሴካ “ሲዩዛ ሃይላ ዲዛዳይ ሲዮ!” ጊዳስ።

ዩሱሲ ለሚሶራ ዮቲዛ ጋሶ
(ማቶ 13:10-17፤ ሉቃ 8:9-10)

10 ዩሱሲ ባርካ ዲሸን ታማኔ ናዎዓቲኔ ካሴ ኢዛሪ ዲዛ ኣሳይ ኢዚ ዮቲዳ ለሚሶዛ ገሽ ኢዛ ዛሪ ኦይቺዳ። 11 ኢዚካ ኢስታስ “ኢንቲስ ያሳ ካዎቲላ ፀራ ኤርይ ጌሊዳስ ሸን ካሬን ዲዛይታስ ጊዲኮ ዮዖይ ዉሪ ለሚሶራ ዮቲቲስ። 12 ሄሲካ ካሴ

* 4:1 ሉቃ 5:1-3

ኢስቲ ቤዩዲ ቤዩዲይሳ ኣኬኮንታ ማላኔ ሲሞንታ ማላ፣ ቃሴካ ኢስታ ናጋራይ ማራቶንታ ማላኮ” ገደሰ።

13 ቃሴካ ዩሱሲ “ሃይሲ ለሚሶይ ኢንቴሰ ጌሊቤኔ? ሂሰቲን ሃራ ለሚሶ ኢንቴ ዋሰቲ ኤራኔ? 14 ዜሪዛዴይ ቃላ ዜሬሰ። 15 ኢሲ ኢሲ ኣሳቲ ኦጌ ቦላ ዋዲዳ ዜሬላ ሚሳቲቲሰ፤ ኢስቲ ቃላ ሲዩዛ ዋዴ ፃላዔይ ዩዲ ሄራካ ኢስቲ ሲዩዳ ቃላ ኢስታ ዋዝናፔ ኤኪቲሰ። 16 ሄሳላካ ሃራቲ ሜላ ቢታ ቦላ ዋዲዳ ዜሬላ ሚሳቲቲሰ። ኢስቲ ቃላ ሲይዲ ኡፋይሳን ኤኬቴሰ። 17 ጊዶ ኣቲን ኢስቲ ፃጶ ዩዶንታ ገሽ ጉላ ዋዴ ጋምዒሺን ቃላ ጌዶን ሜቶይ ዋይኮ ጎዴታይ ኣሳታ ቦላ ዩዛ ዋዴ ሄራካ ፉጶቴቲሰ። 18 ሃራቲ ቃሴ ኣጉንሳ ጊዶን ዋዲዳ ዜሬላ ሚሳቲቲሰ፤ ኢስቲ ቃላ ሲሲ ሲዩቴሰ። 19 ጊዶ ኣቲን ሃ ቢታ ሜቶይ፣ ሚሻ ሲቆይኔ ሃራ ኣሞይ ኢስቲ ሲዩዳ ቃላ ጩሊዲ ኣይፌ ኣይፎንታ ማላ ዲጌሰ። 20 ሃንኮይቲ ሎዖ ቢታን ዜሬቲዳ ዜሬላ ሚሳቲቲሰ፤ ሄይቲካ ቃላ ሲይዲ ኤኪዛዴኔ ሄቩ ታሙ ኣይፌ፣ ኡሱፑን ታሙ ኣይፌኔ ፃቴ ኣይፌ ኣይፌዛይታ” ገደሰ።

ጌማን ዲዛ ፃምፔ
(ሉቃ 8:16-18)

21 ቃሴካ ዩሱሲ “ፃምፔ ኣይሊዲ ጌማሶን ዋይኮ ኣርሳ ጊዶን ዋሊ ኤሬቲ? ፖዓና ማላ ቆንጩሶን ዋሕታ ጊዴኔ? * 22 ሄሳ ገሽ ቆቴቲዲ ቆንጩ ኬዘንታይ፣ ፖዖን ኬዘንታ ጌማን ኣታናይ ባሞ። * 23 ሄሳ ገሽ ሲዩዛ ሃይሊ ዲዛዴይ ሲዮ!” ገደሰ።

24 ጉጂዲካ “ኢንቴ ሲዩዛይሳ ዋዝናን ዋሊቴ፤ ኢንቴ ማኪዛ ሚሻራ ኢንቴሰ ማኬታና፤ ሄሳፊካ ዳሮይ ጉጃታና። * 25 ዲዛዴሰ ጉጃታና ሺን ባይንዳዴፌ ኢዛሰ ዲዛራካ ኤኬቲቻና” ገደሰ። *

ዲጩዛ ዜሬላ ለሚሶ

26 ቃሴካ ዩሱሲ “ፆሳ ካዋቴሊ ዜሬላ ዜሪዛ ኢሲ ኣሰ ሚሳታዉሰ። 27 ዜሪዳዴይ ኦማርሰ ጳሲኬሰ። ዋንቲሺን ዴንዴሰ፤ ጊዶ ኣቲን ኢዚ ኤሮንታ ዲሺን ዜሬቲዳ ካላይ ሞኪዲ ዲጩሰ። 28 ጋዴያካ ኮይሮ ጫሬቶ፣ ካሌላዳ ፑዴ፣ ቅሴካ ፑዴዛ ቦላ ሎዖ ኣይፌ ኢማዉሰ። 29 ካላይ ካዲዳፔ ጉዩ ቦኔይ ጋኪን ኬላ ኣዋይ ሄራካ ማፃ ኣይኬሰ” ገደሰ።

* 4:21 ማቶ 5:15፤ ሉቃ 11:33 * 4:22 ማቶ 10:26፤ ሉቃ 12:2 * 4:24 ማቶ 7:2፤ ሉቃ 6:38 * 4:25 ማቶ 13:12፤ 25:29፤ ሉቃ 19:26

ሳናፊጮኛ ጌቲቲዛ ማላ ኣይፌ ለሚሶ

30 ዩሱሲ “ዋሳ ካዋቴሉ ኑ ኣዛራ ገኒሳኔ? ኣዛራ ለሚሳኔ?
31 ቢታ ቦላ ኡባፌ ላፋ ገዲዳ ሳናፊጮኛ ኣይፌ ሚሳታዉስ።

32 ዜሬታዳ ዲጪዳፕ ጉዩ ቃስ ኣታኪልቲታ ኡባፌ ኣጲዛ ገሸ ካፎቲ ዩዲ ሄ ኣታኪልቲይ ሃጋታ ኩዋ ገደን ሹምፔቴስ” ገደስ።

33 ዩሱሲካ ኣሳይ ኤካናስ ዳንዳዩዛይሳ ኬና ሃይታ ሚሳቲዛ ሃራ ዳሮ ለሚሶራ ኢስታስ ዮቲደስ። 34 ኣይ ሚሽ ገዲኮካ ኣሳስ ለሚሶይ ባይንዳ ዮቲ ኤሬና። ኢዚኔ ኢዛ ካሊዛይቲ ፃላ ዲዛ ዋዴ ገዲኮ ዉርሲ ቢርሽ ዮቲስ።

35 ሄ ጋለስ ጋዴይ ቃሚሺን ባና ካሊዛይታ “ኣኔ ጌዴ ሄ ፒንላ ፒናስ” ገደስ። 36 ኢስቲ ኣሳ ሄን ኣጋገዲ ኢዚ ኡቲ ዲዛ ዋጎሎዛራ ዩሱሳ ኤኪ ቢዳ። ሃራ ዋጎሎቲካ ኢስታራ ኢሲፌ ዴቴስ። 37 ሄ ዋዴ ዋልቃማ ዳምባላይ ኣባ ቦላ ዴንዲዲ ዋጎሎዛ ሃላ ኩማና ጋካናስ ዳምባላይ ሹጮቹዴስ። 38 ገደ ኣቲን ዩሱሲ ቦርኮላ ቦርኮቲዲ ዋጎሎዛስ ጉዩ ባጋን ኢቹዴስ። ኢስቲካ ኢዛ ዴንሳዲ “ኣስታማሬ! ኑኒ ጳዩሺን ኔና ሜቴኔ?” ገደ።

39 ኢዚካ ዴንዲዲ ጫርኮዛ “ጮፀ ጋ!” ኣባካ “ዋፑ ጋ!” ገደስ፤ ጫርኮይካ ጮፀ ገደስ፤ ሙሉካ ጮፀ ገደስ። 40 ባና ካሊዛይታካ “ሃይሳላ ኣዛስ ባቢዳቲ? ሃይሳ ጋካናስ ኢንቴስ ኣማናይ ባዊ?” ገደስ።

41 ኢስቲካ ኬሂ ባቢዲ ባ ገደን ኢሶይ ኢሳራ “ጫርኮይኔ ኣባይ ኢዛስ ኣዛዜቲዛይ ሃይሲ ኦኔ?” ጌቲቲዳ።

5

ዩሱሲ ኢሲ ቱና ኣያናይ ኢዛ ቦላ ዲዛዴ ፓሌዴስ

(ማቶ 8:28-34፤ ሉቃ 8:26-39)

1 ኣባ ፒኒዲ ጌዴ ጌርጌሴኖኔ ጌቲቲዛሶ ቢዳ። 2 ዩሱሲ ዋጎሎዩፕ ዋጲዳ ማላ ቱና ኣያናይ ኢዛ ቦላ ዲዛዴይ ዲፎፔ ኬዚዲ ዩሱሳራ ጋጋና ኢዛኮ ዩዴስ። 3 ሃይሲ ኣዴዚ ዲፎሶን ዲዛዴኔ ሃራይ ኣቶሺን ኦኒካ ኢዛ ሳንሳላታንካ ቃቻናስ ዳንዳይቤና። 4 ዳሮ ዋዴ ቶሆ ቢራታራኔ ሳንሳላታራ ቃሹቴስ። ገደ ኣቲን ኩሹ ሳንሳላታ ዲፍላ ዩጌስ፤ ቶሆ ቢራታካ ማንፍሬላ ዩጌስ፤ ኦኒካ ኢዛ ኦይኪዲ ቲቃናስ ዳንዳይቤና። 5 ጋለሲኔ ቃማ ዲፎታ ገደኒኔ ዙማታ ቦላ ዩዩ ዩዩ ዋሲሹ ባ ቦላ ሹቻራ ቃንፃሬላዲ ማዲንፍስ።

6 ኢዚካ ዩሱሳ ሃሆን ቤዩዳ ማላ ዋላን ኢዛኮ ዩዲ ኢዛ ሲንላን ጉልባቲዲ ጎይኒዴስ። 7 ኬሂ ዋሲዲ “ሃይሶ ዋጋ ያሳ

ና ዩሱሳ፣ ኔስ ታናራ አዚ ዲዜ? ያሳ ሱንላን ታ ኔና ዋሳይስ ታና ዋይሶፓ” ጊዴስ።⁸ ኢዚ ሄሳ ጊዳይ ዩሱሲ ካሴ “ኔ፤ ቱና ኣያናይ ሃይሳፌ ኬዛ” ጊዳ ገሻሳ።

⁹ ሃሳፌ ቃሴ ዩሱሲ ኢዛ “ኔ ሱንላ ኦኔ?” ጊዳ ኦይቹዴስ። ኢዚካ “ኔ፤ ዳርታ ጊዳዳ ገሽ ታ ሱንላ ለጎኔ ጌቴቴስ” ጊዴስ።
*

¹⁰ ሄ ዴሬፔ ኬሲ ዩደንታ ማላ ዩሱሳ ኬሂ ዋሲዴስ።

¹¹ ሄን ማታን ዙማ ቦላ ዳር ጉዲንላ ሄሜቴስ።¹² ቱና ኣያናቲ “ኑ ጉዲንላታን ጌላና ማላ ኑስ ኤር ጋርኪ?” ጊዳ ዩሱሳ ዋሲዳ።

¹³ ኢዚካ ኢስታስ “ኤር” ጊዴስ። ቱና ኣያናቲካ ኣዴዛፔ ኬዚዲ ጉዲንላታን ጌሊዳ። ናምዑ ሺ ጊዳዳ ጉዲንላይ ዉሪ ኣፎዛራ ዲጌላ ጌንዴሬቲ ዋዲዲ ኣባን ሚቴቲዳ።

¹⁴ ጉዲንላ ሄሚዛይቲ ባቃቲዲ ሃኒዳይሳ ካታማኒኔ ዴሬ ጊደን ዮቲዳ። ዴሬይካ ሃኒዳይሳ ቤያናስ ባ ዲዛሶፔ ዲዛሶፔ ኬዚዴስ።

¹⁵ ዩሱሳኮ ዩዲ ዳር ዳይዳንላ ኢዛ ቦላ ዲዛ ኣዴዛ ዋዝናይ ኢዛስ ሲሚን ማይፆ ማይዒዲኔ ዋጋራ ኡቲዳይሳ ዩዳ ኣሳይ ቤዩዲ ባቢዴስ።¹⁶ ሃይሳ ቤዩዳ ኣሳይ ዳይዳንላ ኢዛ ቦላ ዲዛ ኣዴዛ ገሺኔ ጉዲንላቲ ሃኖይሳ ዴሬዛስ ዮቲዳ።

¹⁷ ሃሳፌ ጉዬ ሄ ዴሬ ኣሳይ ዩሱሲ ኢስታ ዴሬ ዩዲዲ ባና ማላ ዋሲዴስ።

¹⁸ ዩሱሲ ዋጎሎን ጌሊሺን ዳይዳንላቲ ኢዛፔ ኬዚዳ ኣዴዚ ዩሱሳራ ዳናስ ዋሲዴስ።

¹⁹ ዩሱሲ ቃሴ ኢዚ ኦይቹዳይሳ ኣካይ ጊዲኔ “ኔ፤ ጌዴ ኔ ሶ ባ፣ ጎዳይ ኔስ ኣይ ማላ ጊታ ሚሽ ኦሊዳኮኔ ኢዚ ኔስ ኦሊዳ ማርቴላ ኔ ሶ ኣሳስ ዮታ” ጊዴስ።

²⁰ ኣዴዚካ ባሶ ቢዲ ዩሱሲ ኢዛስ ኦሊዳ ጊታ ሚሽ ዉርሲ ታሙ ካታማ ጌቴቲዛ ዴሬን ዮቲን ሲዩዳይ ዉሪካ ማላሌቲዴስ።

²¹ ቃሴካ ዩሱሲ ዋጎሎን ጌሊዲ ጌዴ ፒንሐ ፒኒዲ ኣባ ኣቻን ዲሺን ዳር ኣሳይ ኢዛ ኣቹ ሺቁዲኔ ኢዛ ጊደሊዴስ።

²² ኣይሁዳታ ዋሳ ኬላ ሃላቃታፔ ኢሶይ ኢያዒሮሳ ጌቴቲዛይሲ ኢዚ ዲዛሶ ቢዲ ዩሱሳ ዴሚዳ ማላ ኢዛ ቶሆ ቦላ ኩንዲዲ

²³ “ታስ ጉላ ና ዲዛራ ሃይቃና ጋዉስ። ኢዛ ሃይቆንታ ፓፃ ዳና ማላ ኔ ሃ ያዳ ኔ ኩሽ ኢዚ ቦላ ዋላርኪ?” ጊዳ ኬሂ ዋሲዴስ።

²⁴ ዩሱሲካ ኢዛራ ኢሲፌ ቢዴስ። ዳር ኣሳይ ኢዛ ኡንዔላና ጋካናስ ካሊዴስ።

* 5:9 ለጎኔ ጉሲ ዳር ዋታዳራታ ቡቴ [ጨፊራ] ጉሳ።

25 ታማኔ ናምዑ ላይሉ ኩሜሉ ሱሌ ኢዚ ቦላፌ ጉኪዛ ማጫሰ ዲዛራ ሂን አሳራ ዳወሰ።

26 ኢዛ ባሲ ዲዛ ሚሽ ወርሳ ኦንጋና ጋካናሰ አኪሚፕ አኪሚ ላሞን ዳሮ ዳቡራዲሰ። ጊዶ ኣቲን ሳኮይ ኢዚሰ ጌዴ ዳሪዴሰ ኣቲን ኣይኮካ ሎሲቤና። 27 ኢዛ ዩሱሳ ገሽ ሲዱዳ ማላ አሳ ጊዶራ ዩሱሳ ጉዩራ ካላዳ ኢዛ ማይዎ ቦቻዲሰ። 28 ጋሶይካ “ታ ኣይ ሃናዳካ ኢዛ ማይዎ ኩሹራ ቦቻ ቦቻዳኮካ ታ ፓፃና” ጋዳ ቆፕዳ ገሻሳ።

29 ጉኪዛ ሱላይ ሄራካ ኤቂ አገዴሰ፤ ኢዛካ ፓፂዳይሳ ባ አሳቴላን ኤራዲሰ። 30 ባፔ ዋልቃይ ኬዚዳይሳ ዩሱሲ ኤሪዲ ጌዴ አሳኮ ሰሚዲ “ታ ማይዎ ኦኔ ቦቻዳይ?” ጊዴሰ።

31 ኢዛ ካለዛይቲ ቃሴ “ሃይሲ ዳሬይ ኡንዴቲዲ ሱጌቲሺን ቤያሽ ዋናዳ ‘ታና ቦቻዳይ ኦኔ?’ ጋይ” ጊዴ።

32 ዩሱሲ ሄሳ ኦሊዳይ ኦናኮኔ ቤያናሰ ዩሺ ያሊዴሰ።

33 ማጫሳያካ ባሰ አዚ ዋኒዳኮኔ ኤራዳ ባባሽኔ ኮኮራሽ ያዳ ዩሱሳ ሲንላን ጉፋናዳ ሃኒዳ ቱማ ወርሳ ኢዛሰ ዮታዲሰ።

34 ኢዚካ “ታ ናዩ! ኔ አማናይ ኔና አሽዴሰ። ሳርን ባ! ኔ ዋዩፔ ፓፃ!” ጊዴሰ።

35 ዩሱሲ ቡሮ ሃሳያን ዲሺን ኣይሁዳታ ዋሳ ኬሌ ሃላቃ ኢያዲሮሳ ሶፔ ዩዲ ኢያዲሮሳሰ “ኔ ናያ ሃይቃዲሰ፣ ጎዳ ማላ ኣዛሰ ዳቡሪሳይ?” ጊዴ።

36 ጊዶ ኣቲን ዩሱሲ ኢሰታ ሃሳያ ለፕ ሂሰቲዲ ኣይሁዳታ ዋሳ ኬላ ሃላቃዛ “ኔ አማኖ ፃላ አማና ኣቲን ባቦፋ!” ጊዴሰ።

37 ጳፀሮሳ ያቆቤራኔ ያቆቤ ኢሻ ዮሃኒሳፔ ኣቲን ሃራይ ኦኒካ ኢዛ ካላና ማላ ኮይቤና። 38 ጌዴ ኣይሁዳታ ዋሳ ኬላ ሃላቃ ሶ ጋኪዳ ማላ አሳይ ዋሲሽ ጫሞ ዩሆ ዩኪዛይሳ ቤዩዴሰ። 39 ሶ ጌሊዲ “ሃይሲ ወሪ ኣዛ ዋሶኔ ኣዛ ዩሆ? ናያ ጳሰካዲሰ ኣቲን ሃይቃቤይኩ” ጊዴሰ።

40 ቃሴ አሳይ ወሪ ኢዛ ቦላ ሚጫዴሰ፤ አሳ ወርሲካ ኬላፌ ኬሲዲ ናይ ኣዋኔ ናይ ኣዩዮ ቃሴካ ኢዛራ ኢሲፌ ዩዳይታ ኢዛ ካለዛይታ ፃላ ካሌሊዲ ናያ ዲዛ ሶ ጌሊዴሰ። 41 ናይ ኩሹካ ኦይኪዲ “ፃቢታ ኩሞ!” ጊዴሰ። “ፃቢታ ኩሞ” ጉሳሰ ቢርሸሌ “ሃኔ ናዩ፣ ዴንዳ” ጉሳ።

42 ናያካ ሄራካ ዴንዳ ኤቃዲሰ፤ ሄኔ ሃኔ ሃሙታዲሰ። ኢዚሰካ ላይላይ ታማኔ ናምዑ ላይላ፤ አሳይካ ሄ ሃናዛን ዳሮ ማላላቲዴሰ። 43 ዩሱሲ ሃይሳ ኦኒካ ኤርንታ ማላ ኬሂ ሚንሌ ዮቲዴሰ፤ “ናይሰ ማና ቁማ ኢሚቲ” ጊዴሰ።

6

ናዚሬቴ አሳይ ዬሱሳ ኤኪቤቴና
(ማቶ 13:53-58፤ ሉቃ 4:16-30)

1 ሄሳፌ ጉዬ ዬሱሱ ሄፔ ዳንዲዲ ጌዴ ባ ዴሬ ቢዴሰ። ኢዛ ካሊዛይቲካ ኢዛራ ቢዴ። 2 ኣይሁዳታ ሳምባታይ ጋኪን ኣይሁዳታ ዋሳ ኮሌ ጌሊዲ ታማርሲሽን ሲዱዳ አሳይ “ሃይሲ አዴዚ ሃይሳ ወርሲ አዋፔ ኤኪዴ? ሃይሲ ኢዛሰ አሜቲዳ ኤራቴላይ አዜ? ቃሴ ሃይቲ ኢዚ ኦሉዛ ማላታቲ ዋኒ ኢዛ ኩሼን ሃኒዛ?” ጊሼ ማላሌቲዳ። 3 “ሃይሲ አናፃዛ ጊዴኔ? ማራሚ ና ያቆቤንታ ዮሳንታ፥ ዩሁዳንታኔ ሲሞናንታ አሻ ጊዴኔ? ኢዛ ሚቹቲ ኦናራ ሃን ኦ ማታን ዲዛይታ ዴቴኔ?” ጊዲ ሄሳፌ ዳንዲዳይሳኒ ኢዛን ኡፋዬቲቤቴና።

4 ዬሱሱካ ኢሰታሰ “ናቤይ ቦንቹቶንታይ ባ ዴሬን ባ ዳቦታ ጊደኒኔ ባሶ አሳ አቻን ፃላ” ጊዴሰ። *

5 ሄን ጉላ ሃርጋንቻታ ቦላ ኩሼ ዋላ ፓላሪፔ አቲን ሃራ አይኮ ማላታካ አላናሰ ዳንዲይቤና። 6 ኢሰታሰ አማኖይ ባይንዳይሳ ቤዱዲ ማላሌቲዴሰ። ሄሳፌካ ዬሱሱ ጉታን ጉታን ዩዩ ዩዩ ታማርሲዴሰ።

ባና ካሊዛ ታማኔ ናምባታ ዬሱሱ ኪቲዴሰ
(ማቶ 10:5-15፤ ሉቃ 9:1-6)

7 ታማኔ ናምባታ ባኮ ፃይጊዲ ናምቡ ናምቡ ሂሰቲ ከቲሽ ቱና አያናታ ቦላ ኢሰታሰ ጎዳቲላ አሚዴሰ። 8 ኢዚ “ኦጌሰ ጊዲዛ ጉፌ አቲን ኦጌ ሸንቄ ዋይኮ ኮሮጆ ዋይኮ ሚሽ ኦይኮፍቴ። * 9 ጫማ አላቲ ጊደ አቲን ላማና ማይዖ ኦይኮፍቴ። 10 ኢሲ ኮሌ አንቲ ጌሊኮ ሄ ካታማፔ አንቲ ኮዛና ጋካናሰ ሄ ኮላን ዲቲ። 11 አዋንካ ኦኒካ አንቲና ሞኪ ኤኮንታ ኢዳኮ ሄፔ ኮዚሽ ሄ ዴሬታ ቦላ ማርካ ጊዳና ማላ አንቲ ቶሆ ቦላ ዲዛ ጉዲላ ቆቆፍቴ” ጊዲ አዛዚዴሰ። **

* 6:4 ዮሃ 4:44 * 6:8 ሉቃ 10:4-11 * 6:11 ጊዲዜ ኦራላ ጫቆ ማፃፋዪኔ 1947 ማርቲላ ላይላን ፃፊቲዳ አማራላ ጌሻ ማፃፋይ ሃይሳፌ ካሊዲ ዲዛ ቆፋ ጉጃቲሰ፤ “አንቲሰ ቱማ ጋይሰ፤ ሄ ካታማይፔ ሶዶሜሰኔ ጋሞራሰ ፐርራሰ ጋላሰ ሎላና” ሃይሳ ሃ ቆፋይ ገሪኬ ቃላን ቢርሽቲዳ ማፃፋታን ዴና። * 6:11 ሃዋ 13:51

12 ኢስትካ ሄፔ ኬዚዲ ዳሬይ ማርቴላን ጌላና ማላ ሳባኪዳ።
 13 ዳር ዳይዳንጎታ ኬሲዳ፤ ዳር ሃርጋንቻታ ዛይቴ ቲዬ ቲዬዲ ፓሊዳ። *

ፃማቁዛ የሃኒሳ ሃይቆ
 (ማቶ 14:1-12፤ ሉቃ 9:7-9)

14 ዬሱሳ ሱንጢ ካሴፔ ኤሬቲ ኤሬቲ ቢሺን ካዎ ሄርዶሲ ሄሳ ሲዩደስ። ኢሲ ኢሲ አሳቲ “ሃይሳ ማላ ማላታታ ኦሊዛ ፃማቁዛ የሃኒሲ ሃይቆፔ ዳንዲኒኮ” ጊዳ።

15 ባጋይቲ “ኤላሳ” ጌቴስ፤ ባጋ አሳይ ቃሴ “ካሴ ናቤታፔ ኢሳ ሚሳቲስ” ጌቴስ።

16 ሄርዶሲ የጾዛ ሲይዲ “ታ ኢዛ ቆቆ ቃንዲሲዳ የሃኒሲ ሃይቆፔ ፓዲ ዳንዲዳስ” ጊዳስ። 17 ሄርዶሲ ባ አሻ ፐሊጶሳ ማቾ ሄርዲያደ ኤኪዳ ጌዶን ኦይኬቲዲ ቃሹታና ማላ አዛዚዲ የሃኒሳ ቃሾ ኬሌ ጌልሊዳስ። 18 የሃኒሲ ሄርዶሳ “ኔ ኢሻ ማቾ ኔ ኤኮንታ ማላ ዎጋይ ኔና ዲጌስ” ጊዳ ጊሽ ቃቺዳስ። *

19 ሄርዲያዳ ሄሳ ጊሽ ሆሎታዳ ኢዛ ዎቋሳናስ ኮያዲስ ሺን ዳንዳያቤኩ። 20 ጋሶይካ የሃኒሲ ዲሎኔ ጌሻ አስ ጊዲዳይሳ ሄርዶሲ ኤሪዛ ጊሽ የሃኒሳስ ባቤሲኔ ኢዛ ናጌስ። የሃኒሲ የቲዛይሳ ሄርዶሲ ሲይዲ ሄርጊዛ ጊዲኮካ ኢዚ የቲዛይሳ ዎዝናፔ ሲዩስ።

21 ሄርዶሳ ዬሌታ ጋላስ ቦንቻናስ ቶቃ ሹሜታስ፤ ኦላ ዎታዳራታ አዛዚዛ ዋናታሲኔ ጋሊላ ቢታን ኬሂ ኤሬቲዛ ጌታ አሳታስ ጊቢራ ኬሲዳስ፤ ሄሲካ ሄርዲያዲስ ጌጋ ጋላስ ጊዲዳስ። 22 ሄርዲያዲ ማጫ ናያ ጌላዳ አሳ ሲንጎን ዬላ ዬዲን ሄርዶሳኔ ኢዚ ያይጊዳ አሳ ኢዚ ዬላይ ኡፋይሲዳስ። ካዎይካ ናዮ “ኔ ኮዩዛ ሚሽ ወርሳ ታና ኦይቻ ታ ኔስ ኢማና” ጊዳስ። 23 ቃሴካ ታ ካዎቲላ ባጋ ጊዲዳኮካ ኔ ኦይቺኮ ወርሳ ታ ኔስ ኢማና ጊዲ ኢዚስ ጫቂዳስ።

24 ናያካ ኤሌላ ኬዛዳ ባ አዬዮ “ካዎ አይ ኦይቾ?” ጋዲስ። አዬያካ “ፃማቁዛ የሃኒሳ ሁዔ ቃንፃዳ ኢማ ጋ” ጋዲስ።

25 ናያካ ኤሌላ ኬዛዳ ካዎዛኮ ጌላዳ “ፃማቁዛ የሃኒሳ ሁዔ ኬሬን ዎላዳ ኔ ታስ ኢማና ማላ ኮያይስ” ጋ ኦይቻዲስ።

26 ካዎይ ሄ የጾዛን ዳር ዎቆቲዳስ፤ ጊዳ ኦቲን ያይጌቲዳ ኢማላ ጊሺኔ ጫቂዳ ቃላ ጊሽ ኢዚስ አካይ ጋናስ ኮይቤና።

27 ሄሳ ጊሽ ዎታዳራታፔ ኢሳ ኤሶን ከቲዲ የሃኒሳ ቆቆ ቃንዲዲ

* 6:13 ያቆ 5:14 * 6:18 ሉቃ 3:19-20

ኢዛ ሁዔ ኤኪ ያና ማላ አዛዚዳሰ፤ ኢዚካ ቢዲ ቃሾ ኬላ ገደን የሃኒሳ ቆጼ ቃንዲዳሰ። 28 ሁዔዛ ኬሬራ ኤሂዲ ናይሰ ኢሚዳሰ፤ ናያካ ባ አይደሰ ኢማዲሰ። 29 የሃኒሳ ካሊዛይቲካ ሄሳ ሲዩዲ ማላ ዩዲ የሃኒሳ አሃ ኤኪ ኤፊዲ ሞገዳ።

ዬሱሲ ኢቻሹ ሺ ዳሬ ሚዚዳሰ
(ማቶ 14:13-21፤ ሉቃ 9:10-17፤ ዮሃ 6:1-14)

30 ሃሳፌ ጉዬ ሃዋሬቲ ሲሚዲ ዬሱሳ አቻን ዩዩ አጲ ባ ኦሊዲይሳኔ ባ ታማርሲዲይሳ ወርሲ ኢዛሰ የቲዳ። 31 ዳር አሳይ ዩሺኔ ቢሽ ገዛ ገሽ ቁማ ሚዛ ዋዳይካ ቤቲቤና፤ “እኔ እንቲ ያላ ታናሩ አሲ ባይንዳሶ ቢዲ እኔ ጉሉ ሸምፕ ኤኪቲ” ገዳሰ። 32 ሄሳ ገሽ ኢሰቲ ባርካ ዋጎሎን ጌሊዲ ኢሲ አሲ ባይንዳሶ ቢዳ።

33 ኢሰቲ ቢሽን ዳርቲ ቤዩዲ ቶሆራ ዋሳን ኢሰታፌ ሲንሉ አጲዳ። 34 ዬሱሲ ዋጎሎዛፔ ዋጲዛ ዋዳ ዳር ዳሬይ ሸቂ ኡቲዲይሳ ቤዩዳሰ። ሄሚዛዳይ ባይንዳ ሚሄ ማላ ገዲዳ ገሽ አሳሰ ቃጴቲዳሰ። ዳር የጋካ ታማርሶ ኦይኪዳሰ። *

35 ሄ ዋዳ ጋይይ ቃሚ ቃሚ ቢዛ ገሽ ኢዛ ካሊዛይቲ ኢዛኮ ሸቂዲ “ሃይሲ ኑ ዲዛሶይ ባዘኮ፣ ጋይይካ ቃሚዳሰ። 36 ሃይሳ ሄራን አሲ ዲዛሶ ቢዲ አሳይ ባሰ ሚዛ ካሉ ሻሚ ማና ማላ አሳ ዬዳ” ገዳ።

37 ኢዚ ኢሰታሰ ዛሪዲ “አሳሰ ሚዛ ሚሽ እንቲ አሚቲ” ገዳሰ። ኢሰቲካ ማላሉቲዲ “ኑኒ ቢዲ ናምዑ ጻቱ ዲናሬራ ካሉ ሻሚዲ ሃይሳ አሳሰ አሚዛኮ ገዳንዳ?” ገዳ። †

38 ኢዚካ ኢሰታሰ “እንቲሰ አይ ላጌ ኡኬሊ ዲዛኮኔ እኔ ቢዲ ጻሊቲ” ገን ኢሰቲ ቢ ጻሊዲ “ኢቻሹ ኡኬሊኔ ናምዑ ሞሌይ ዳሰ” ገዳ።

39 ሃሳፌ ካሊዲ አሳ ጨሊላ ማታ ቦላ ኦይዳን ኦይዳን ኡቲሳና ማላ አዛዚዳሰ። 40 አሳይካ ጻቱ ጻቱኔ ኢቻሹ ታሙ ኢቻሹ ታሙ ገዲዲ ኦይዳን ኡቲዳሰ። 41 ኢዚካ ኢቻሹ ኡኬሳኔ ናምዑ ሞሌታ ባ ኩሽን ኦይኪዲ ፑዳ ሳሎ ጻሊዲ አንጂዲኔ ኡኬሳ ሚንሉ ሚንሉ አሳሰ ገሻና ማላ ባና ካሊዛይታሰ ኢሚዳሰ፤ ናምዑ ሞሌታካ ኡባ አሳሰ ሻኬሬሊዳሰ። 42 አሳይ ወሪካ ሚዲ ካሊዳሰ። 43 ዬሱሳ ካሊዛይቲ አሳይ ካሊ ሚን አቲዳይሳ ታማኔ

* 6:34 ታይ 27:17፤ 1ካዋ 22:17፤ 2ታር 18:16፤ ሃዚ 34:5፤ ማቶ 9:36
† 6:37 ሄ ዋዳ 200 ዲናሬ ዳማናሰ ኢሲ አሲ 200 ጋላሰ ኦላናሰ ኮሺሰ።

ናምዑ ጥላ ኩሜል ሺሺዳ። 44 ካል ሚዳ አሳፔ አቴማሳይ ፃላ ኢቻሹ ሺ።

ዩሱሲ አባ ቦላራ ሃሙተዳሰ
(ማቶ 14:22-33፤ ዮሃ 6:15-21)

45 ሄራካ ኢዚ አሳ ሞይዚሽ ኢዛ ካሊዛይቲ ሰንፋተዲ ጌዴ ፒንል ቤቴሳይዳ ጌቴቲዘሶ ፒናና ማላ አዛዚዳሰ። 46 ሄፔካ ኢስታ አጋጊዲ ዋሳናሰ ፑዴ ዙማ ቦላ ኬዚዳሰ።

47 ጋዴይ ቃሚን ዋጎሎይ አባ ጊዶን ዲሺን ኢዚ ባርካ ቢታ ቦላ ዳሰ። 48 አባ ቦላ ጫርኮይ ኬሂ ሜተዳ ጊሽ ኢዛ ካሊዛይቲ አባ ሽሪ ሽሪ ዋጎሎ ላጊዛ ሚሻራ ባዳቲሺን ዩሱሲ ቤዩዳሰ። ዋንታ ቦላ ኢስታኮ ዩዳሰ፤ ዩዲኔ ኢስታ አቻራ አዲ ባናላ ሃኒዳሰ። 49 ጊዶ አቲን አዲ ባና ሃኒሺን ኢዛ ቤዩዳ ማላ ሞይተሌ ቤዩዳ ሚሳቲን ወሪካ ዋሲዳ። 50 ወሪካ ኢዛ ቤዩዲ ዲጋሚዳ፤ ኢዚካ ሄራካ ኢስታ ዮቺዳኔ “አይኮይ ባ፤ ታናኮ ዲጋሞፍቴ!” ጊዳሰ። 51 ኢዚካ ዋጎሎን ኢስታኮ ጌሊን ጫርኮይ ጮዑ ጊዳሰ፤ ኢስቲካ ዳሮ ማላሌቲዳ። 52 ካሴ ኢዚ ኡኬፋን ኦሌዳ ማላታ ቢርሼል ኢስቲ ኤርንታ ጊሽ ኢስታ ዋዝናይ ደጪዳሰ።

53 አባ ፒኒዲ ጌንሴሬዩ ጌቴቲዘሶ ጋኪዳ፤ ዋጎላፔ ዋዲዲ ዋጎሎዛ ሄን ቃቺዲ አጊ ቢዳ። 54 ኢስቲ ዋጎሎፔ ዋዲዳ ማላ አሳይ ዩሱሳ ኤሪዳሰ። 55 ወሪካ ባ ዲዛሶ ዲዛሶ ዋዩሬቲዲ ሃርጋንቻታ ሃላን ቶኪ ቶኪ ኤኪዲ ዩሱሲ ዲዛሶ ኤሂዳ። 56 ኢዚ ጋኪዳ ጉታን ዋይኮ ካታማ ጊዶን ዋይኮ ዳሬ ጊዶን ጊዶን ሃርጋንቻቲ ኢዚ አዲሺን ኢዛ ዋሲዲኔ ኢዛ ማይዎ ቦቺዲ ፓፃና ማላ ሺሺ ሺሺ ዲቡሻይ ዲዛሶን ዋሊዳ። ኢዚ አዲ ቢሺን ኢዛ ማይዎ ቦቺዳይቲ ወሪ ፓዲዳ።

7

ካሴ አይሁዳ አዋታ ዋጋ
(ማቶ 15:1-9)

1 ሃሳፌ ጉዬ ፋርሳዌቲኔ ዩሩሳላሜፔ ዩዳ ኢሲ ኢሲ ያፌቲ ዩሱሳ ሳንቄን ዩዩ አዲዳ። 2 ዩሱሳ ካሊዛይታፔ ባጋይቲ ሜጩቶንታ ቂታ ኩሼራ ካል ሚሺን ቤዩዳ።

3 ፋርሳዌቲኔ ካሴ ጪማ አይሁዳ አሳቲ ካሴ ዳሬ ዋጋ ናጋናሰ ኩሼ ሎዔል ሜጩቶንታ ካል ሚ ኤሬቴና። 4 ጊያ ቢ ሲሚኮካ

ቦላ ሜጩቲ ገዮንታ ዲሼ ካል ሚ ኤሬቴና። ሄሳዳካ ዋንጫካ፣ ኦቶካ፣ ኬሬካ፣ ኢቸዛ ሂሴካ ሜቻ ማላታ ሃራ ዋጋታካ ናጌቴሰ።
5 ፋርሳዌቲኔ ፃፊቲ ዬሱሳ “ኔና ካሊዛይቲ ካሴ ኣዋታ ዋጋ ማላ ዲሰ ኣጊዲ ኣዛሰ ኩሼ ሜጩቶንታ ካል ሚዞ?” ጊዲ ኦይቸዳ።

6 ኢዚካ ኢሰታሰ “ኢሳያሲ ቆጶፔ ቆሞን ሃኒዛ ኢንቴ ገሽ ሃይሲ ዳሬይ ባ ሜቴርሻን ፃላላ ታና ቦንቸሰ፤ ዋዘናይ ጊዲኮ ታፔ ሃኪዳሰ።

7 ታሰ ሚላ ሃዳ ጎይኔቲሰ፤ ኢሰታ ተሚርቴይካ ኣሲ ዋሉዳ ዋጋ ፃላ፣ ጊዲ ዮቴዳይሰ ቱማ” ጊዳሰ።

8 ያሳ ዋጋ ኣጊዲ ኣሲ ዋሉዳ ዋጋ ናጌቴሰ። 9 ቃሴካ “ኢንቴ ዋጋሰ ጊዲ ያሳ ዋጋ ኢንቴ ኣጋጊዛ ጨንጫቴላ ኦጌይ ኢንቴሰ ዳሰ። 10 ኣይሰ ገኮ ሙሴይ “ኔ ኣዮኔ ኔ ኣዋ ቦንቻ፤ ባ ኣዮኔ ባ ኣዋ ጫዩዛዳይ ሙሉካ ሃይቆ ጊዳሰ። * 11 ጊደ ኣቲን ኢንቴ ቃሴ “ኢሲ ኣሲ ባ ኣዋ ዋይኮ ባ ኣዮ ኢንቴ ታፔ ዳማናሰ ኮሺዛ ማዶ ታ ያሳሰ ኢማዲሰ፣ ገኮ፤ 12 ኢንቴ ቃሴ ሃይሳዳይ ባ ኣዋሰካ ባ ኣይይሲ ሃራ ኣይኮካ ኦፋና ማላ ኮይኬታ። 13 ሄሳ ገሽ ኢንቴ ዋጋ ናጋና ጊዲ ያሳ ቃላ ላሜታ። ሄይታንታ ሚሳቲዛ ዳርታ ኦሌታ።” ጊዳሰ።

14 ቃሴካ ዬሱሲ ኣሳ ባኮ ፃይጊዲ “ወሪካ ታ ጊዛ ሰዩቴኔ ዋዘናን ዋሉቴ። 15 ካሬፔ ኡሎ ጊደ ጌሊዲ ኣሰ ቱኒሲዛ ኢሲ ሚሽካ ዳና። ሃራፔካ ኣሴ ቱኒሲዛይ ኬላ ኣዋፔ ጌዴ ካሬ ኬዚዛ ሚሻ። 16 ሲዩዛ ሃይሊ ዲዛይ ሲዮ!” ጊዳሰ። *

17 ኢዚ ኣሳ ካሬን ኣጊዲ ኬፍ ጌሊን ኢዛ ካሊዛይቲ ኢዚ ዮቴዳ ለሚሶዛ ቢርሼል ዬሱሳ ኦይቸዳ። 18 ኢዚካ ኢሰታ “ኢንቴሰካ ዮጋይ ጌሌኔ? ካሬፔ ጌሊዲ ኣሴ ቱኒሲዛ ሚሽ ኣዚካ ዳና። 19 ካሬፔ ጌሊዛይ ጌዴ ዋዘናን ጊደንታ፤ ዳጌ ቃንሳ ጊደ ጌሌሰ ቃሴ ሄፔ ኢዛዳ ኣሳቴላፊ ጌዴ ካሬ ኬዜሰ።” ዬሱሲ ሄሳ ጊዳይ ኣሲ ሚዛ ካሊ ወሪካ ጌሽ ጊዲዳይሳ ቆንጨሳናሳ።

20 ካሌሊዲካ “ኣሳፔ ኬዚዛዚ ኣሴ ቱኒሴሰ። 21 ኣሳ ዋዘና ጊደፊ ኬዚዛይ ኢታ ቆፋታ፣ ላይማ ኣሞኔ ካይሶቴል፣ ኣሴ ዋጶ፣ ላይማቴል፣ 22 ዪቄቴል፣ ኢታቴል፣ ባሌል፣ ላይማ ካሰ፣ ቃናቴቴል፣ ኣሳ ሱገል ሞር፣ ኦቶሬቴሊኔ ኣዛላ። 23 ሃይቲ ኢታ ሃኖቴ ወሪ ኣሳፔ ኬዜቴሰኔ ኣሴ ቱኒሴቴሰ” ጊዳሰ።

* 7:10 ኬሳ 20:12፤ 21:17፤ ዛሬ 5:16፤ ለዌ 20:9 * 7:16 ኢሲ ኢሲ ጌሻ ማፃፋቲ ፓይዶ 16 ቦላ ዲዛ ቆፋ ጉጅቴሰ።

ኢሲ ማጫሳይ አማኛ
(ማቶ 15:21-28)

24 ዩሱሲ ሃፔ ኬዚዲ ዓርሴ ጌቴተዛ ዴሬ ቢዴስ። ሄን ኢሳዴ ኬፍ ጌሊዲ ኢዚ ሄን ዲዛይሳ አሲ ኤርንታ ማላ ኮዪዴስ። ጊዶ አትን ኢዚ ሄን ኢዛ ዲሳይ ቆቴታናሰ ዳንዳዬተቤና።

25 ሄራካ ኢሲ ቱና አያናይ ኦይኪዳ ጉፋ ና ዲዛሪ አያ ዩሱሲ ሄን ዲዛይሳ ሲያዳ ኢዛኮ ያዳ ኢዛ ቶሆ ቦላ ኩንዳዲስ።

26 ማጫሳያ አይሁዳ ጊዶንታ ጊሪኬ ቃላ ሃሳዪዛ ማጫሳሺን ኢዛ ዩሌተዳሶይ ሲርፊንቄ ጌቴቱስ። ኢዛካ ዩሱሲ ናይፔ ቱና አያና ኬሳና ማላ ዋሳዲስ። 27 ዩሱሲ ዛሪዲ ኢዚሰ “ናይታ ቀማ ኤኪ ካናሰ ዩጋናሰ ቤሶንታ ጊሽ ኮይሮ ናይቲ ሚ ካሌቶ” ጊዴስ።

28 ኢዛካ ዛራዳ “ኤ ጎዶ! ካናቲካ ማዳ ማታን ዴዒዲ ናይታ ኩሼፔ ጋዴን ዋጂዳይሳ ሜቲሲኮ” ጋዴስ።

29 ኢዚካ “ሂሰቲኮ ኔኒ ሄሳ ጊዳ ጊሽ ባ! ዳይዳንላይ ኔ ናይፔ ኬዚዴስ” ጊዴስ። 30 ኢዛ ሲማዳ ሶ ቢሺን ናያ ዳይዳንላይ ዩዲን ፓዓዳ ሂፃን ኢቸዳሮ ዴማዲስ።

ዩሱሲ ኢሲ ዲና ዲዴቴ ሃይላ ቱሌ አሰ ፓሲዴስ

31 ሄሳፌ ዩሱሲ ዓርሴ ቢታፌ ዴንዲዲ ሲዶና ጊዛሶራ አጂ ታሙ ካታማ ጊዛሶራ ካንሲዲ ጌዴ ጋሊላ አባኮ ጋኪዴስ።

32 አሳይ ኢሲ ሃይላ ቱሌ ኣይፌ ቆቄ አሲ ኢዛኮ ሄ ኤኪ ዩዲ ዩሱሲ ኢዛ ቦላ ባ ኩሼ ዋላና ማላ ዋሲዳ።

33 ዩሱሲካ ኢዛ አሳፔ ሻኪ ኤኪ ቢዲ ባ ኩሼ ቢራዴታ አዴዛ ሃይላን ጌልሲዴስ፤ ቃሴካ ጩቾ ጩቲዲ አዴዛ ኢንፃርሳ ቦቸዴስ።

34 ፑዴ ሳሎ ዪሊዲቴ ቶኪ ሼምፒዲ “ኤፊታ” ጊዴስ። ሄሲካ “ፖጌታ” ጉሳ። 35 ሄራካ አዴዛ ሃይላቲ ፖጌቲዳ፤ ኢንፃርሳይካ ቢርሼቲን ጌሺ ሃሳዪዴስ።

36 ዩሱሲ ሃይሳ ቤዩዳይቲ ኦናሰካ ዮቶንታ ማላ አዛዚዴስ፤ ጊዶ አትን አሳይ ኢዚ አዛዚዛዳይሳፌ ቦላሪ ኬሂ ጉጂዲ ዮቲዳ። 37 ዴሪዚካ ዋጋፔ አሲ ማላሌቲዲ “ኢዚ ኦሲዳይሲ ዉሪ ሎዖ፤ ቱሌቲ ሲያና ማላ፣ ዲና ዲዴቲ ሃሳያና ማላ ኦሲዴስ” ጊዳ።

8

ዩሱሲ ኦይዲ ሺ አሰ ሚዚዴስ
(ማቶ 15:32-39)

1 ሄ ዎዴ ቃሴ ዳሮ ኣሲ ሸቁዳስ። ሸቁዳ ኣሳሰ ሚዛ ካሊ ባይንዳ ጊሽ ዩሱሲ ባና ካሊዛይታ ዪይጊዲ። 2 “ሃይቲ ኣሳቲ ታናራ ሄቹ ጋላስ ጋካናስ ጋምዒዳ ጊሽኔ ቃሴካ ኢስታስ ሚዛ ካሊ ባይንዳ ጊሽ ታና ሚቹቲስ። 3 ኢስታፊ ኢሲ ኢሲ ኣሳቲ ሃሆፔ ዪዳ ጊሽ ሃይሳ ጋፋራ ታ ኢስታ ሶ ዩዲኮ ዳቡሪዲ ኦጌ ቦላ ኩንዳና” ጊዳስ።

4 ኢዛ ካሊዛይቲካ ዛሪዲ “ሃይሳ ባዞን ሃይሳ ማላ ዴሬ ሚዛና ቁማ ኣዎፔ ዴማኔ?” ጊዳ።

5 ኢዚካ ኢስታ “ኢንቴኮን ኣፑን ኡኬሊ ዲዜ?” ጊ ኦይቹዳስ። ኢስቲካ “ላፑን ኡኬሊ ዴስ” ጊዳ።

6 ኢዚካ ኣሳይ ጋዴን ኡታና ማላ ኣዛዚዳስ፤ ላፑን ኡኬላ ባ ኩሽን ኦይኪ ጋላቲዲኔ ሚንሉዲ ኣሳሰ ጊሽቻና ማላ ባና ካሊዛይታስ ኢሚን ኢስቲካ ዴሬዛስ ጊሽዲ። 7 ቃሴካ ሄን ዲዛ ቂሪ ጉላ ሞሌታ ጊሽ ያሳ ጋላቲዲ ጉላ ሞሌታ ኣሳሰ ጊሽቻና ማላ ባና ካሊዛይታ ኣዛዚዳስ። 8 ዴሬይካ ሚዲ ካሊዳስ። ሄሳፊካ ኢዛ ካሊዛይቲ ማዳፊ ፓላሂዳ ካላ ላፑን ፒላ ኩሚላ ዴንሉዳ።

9-10 ሄሳ ሚዳ ኣሳይ ኦይዲ ሸ ጊዳና። ሄ ኣሳ ሞይዚዲ ባና ካሊዛይታራ ዎሳሎን ጌሊዲ ጌዴ ዳልማኦታ ጌቲቲዛሶ ቢዳስ።

11 ፋርሳዌቲ ዩዲ ዩሱሳራ ፓላሚቲላ ኦይኪዳ። ኢዛ ፓጫናስ ኮዩዲ ባና ሳሎፔ ማላታ ቤሳና ማላ ኦይቹዳ። * 12 ኢዚካ ቶኪ ሸምፒዲ “ሃይሲ ዩሌታዚ ኣዛስ ማላታ ኮዩዜ? ታ ኢንቴስ ቱማ ጋይስ፤ ሃይሳ ዩሌታስ ኢሲ ማላታይካ ኢሚቴና” ጊዳስ።

* 13 ኢስታ ሄን ኣጊዲኔ ዎሳሎን ጌሊዲ ሄ ፒንላ ፒኒዳስ።

ፋርሳዌታ ኢርሾኔ ሄርዶሳ ኢርሾ
(ማቶ 16:5-12)

14 ኢዛ ካሊዛይቲ ካላ ኦይኮንታ ባሌቲዳ ጊሽ ኢሲ ኡኬላ ኣቲን ዎሳሎ ጊደን ሃራ ኣይ ካሊካ ዴና። 15 ዩሱሲ ኢስታ “ፋርሳዌታ ኢርሾፊኔ ሄርዶሳ ኢርሾፊ ናጌቲቲ” ጊዲ ኣዛዚዳስ። *

16 ኢስቲ ቃሴ ባ ጊደን ኢሶይ ኢሳራ “ኢዚ ኦና ሃይሳ ጊዛይ ኦስ ካላ ባይንዳ ጊሻሳ” ጊ ዮቲቲዳ።

17 ቃሴ ዩሱሲ ኢስታ ቆፋ ኤሪዲ “ኦስ ካሊ ባይንዳ ጊሽ ጋሳ ጊዲ ኢንቴ ጊደን ኣዛስ ሃሳዬቲቲ? ሃዒካ ዩሺ ቆፔኬቲ?”

* 8:11 ማቶ 12:38፤ ሉቃ 11:16 * 8:12 ማቶ 12:39፤ ሉቃ 11:29
* 8:15 ሉቃ 12:1

ዎዘናንካ ዎሌኬት? ዎይኮ ኢንቴ ዎዘናይ ሹቻቲዳ? 18 ኢንቴሰ አይፌይ ዳሰ ሺን ዓሌኬት? ሃይሌ ዳሰ ሺን ሲዬኬት? አኬኬኬት? * 19 ኢቻሹ ኡኬላ ኢቻሹ ሺ አሳሰ ታ ሜንላ ኢሚን አቸን ጥላ ኩሜላ ካላ ዳንሳዳት?” ጊዳስ።

ኢሰቲካ ዛሪዲ “ታማኔ ናምዑ” ጊዳ። 20 ኢዚካ “ለቸን ኡኬላ ኦይዲ ሺ አሳሰ ታ ሜንላ ኢሚን አቸን ጥላ ኩሜላ ካላ ዳንሳዳት?” ጊ ኦይቸን ኢሰቲካ “ለቸን” ጊዳ።

21 ኢዚካ ኢሰታ “ሂሰቲን ሃዒ ጋካናሰ ዩሺ ቆፒቤኬታካ!” ጊዳስ።

ዩሱሲ ቤተሳይዳን ኢሲ ቆቄ አሲ ፓሌዳስ

22 ሂሳፌ ጌዴ ቤተሳይዳ ጌቴቲዛሶ ቢዳ። ጉላ አሳቲካ ኢሲ አይፌ ቆቄ አሲ ዩሱሳኮ ኤሂዲ ዩሱሲ ኢዛ ቦቻና ማላ ዎሲዳ።

23 ኢዚካ ሄ ቆቄዛ ኩሹ ኦይኪ ጎቹዲ አሲ ዲዛሶፔ ጌዴ ካሬ ኬሲ አዳዛ አይፌን ጨቲዲኔ ባ ኩሹ ኢዛ ቦላ ዎሊዲ “ሃዒ ኔሰ አዚ ቤተዜ?” ጊ ኦይቸዳስ።

24 ኢዚካ ቶቄ ጊ ያሊዲ “አሳይ ሚላ ሚሳቲዲ ቃዳቴሹ ቤቴሰ” ጊዳስ።

25 ቃሴካ ዩሱሲ ባ ኩሹታ ኢዛ አይፌታ ቦላ ዎሊዳሰ፤ ሄራካ ኢዛ አይፌቲ ያሊዳ፤ ፖጋይካ ኢዛሰ ሰሚን ወርሲካ ጌሺ ያሊዳስ። 26 ቃሴ “ሃ ጉታታ ጊዶ ጌሎፓኔ ኦናሰካ ዮቶፓ” ጊዲ ኢዛ ጌዴ ኢዛሶ ዩዲዳስ። *

ዩሱሲ ያሳፕ ከቴቲዳዳ ጊዲዳይሳ ጴፀርሲ ማርካቲዳስ (ማቶ 16:13-20፤ ሉቃ 9:18-21)

27 ዩሱሲ ባና ካሊዛይታራ ቁሳሪያ ፒሊጲሲዮሴ ጌቴቲዛ ዳሬ አቻን ዲዛ ጉታታ ቢዳስ፤ ኢሰቲ ኦጌ ቦላ ዲሺን ባና ካሊዛይታ “ታና አሳይ ኦና ጊዜ?” ጊዲ ኦይቸዳስ።

28 ኢሰቲካ ዛሪዲ ኔና “ፃማቁዛ ዮሃኒሳ ጊዛይቲካ ዳቴሰ፣ ባጋቲ ቃሴ ኤላሳ ጌቴሰ፣ ሃራቲ ቃሰ ናቤታፔ ኢሳዳ ጌቴሰ” ጊዲ ዮቲዳ። *

29 ካሌሊዲካ ኢንቴቶ ታና ኦና ጌቲ? ጊዲ ኦይቸዳስ። ጴፀርሲ “ኔኒ ኪርሰቶሳ” ጊዳስ።

* **8:18** ኤር 5:21፤ ሂዚ 12:2፤ ማር 4:12 * **8:26** ጊዒዜ ጫቆ ኦራሳ ማፃፋዚ 1947 ማርቴላ ላይላን ያፌቲዳ አማራሉ ጌሻ ማፃፋዚኔ ኢሲ ኢሲ ቤኒ ጊሪኬ ቃላን ያፌቲዳ ጌሻ ማፃፋቲ ሃይሳፌ ካሊዛ ቆፋይ ጉጃቲዳስ። ሂሰቲኮ ሃይሳ ኦናሰካ ዮቶፓ።

* **8:28** ማር 6:14-15፤ ሉቃ 9:7-8

30 ዩሱሲካ ባ ጊሽ ኦናሰካ ኢስቲ ዮቶንታ ማላ ሚንሉ ዮቲዴስ።

ዩሱሲ ባ ሃይቃናይሳ ካሴቲዲ ዮቲዴስ
(ማቶ 16:21-28፤ ሉቃ 9:22-27)

31 ሄሳፌ ዩሱሲ ባና ካሊዛይታ፡ “አሳ ናይ ዳሮ ዋዬ ቤያናይሳኔ ዴሬ ጨማታን፡ ቁሴታ ሃላቃኒኔ ፃፊታን ካዲታናይሳ አሳ ኩሼን ሃይቃናይሳ፡ ሃይቆፔ ሃቸንሉ ጋላስ ዴንዳናስ ቤሴስ” ጊዲ ታማርሶ ኦይኪዴስ። 32 ኢዚካ ሄሳ ኢስታስ ቆንጨሲ ዮቲዴስ፡ ጳፀርሲካ ኢዛ ዲማ ሻኪ ኤፊዲ “ሄሳሉ ጎፕ!” ጊዲ ሃንቂዴስ።

33 ዩሱሲ ቃሴ ባና ካሊዛይታ ዩሺ ያሊሼ ጳፀርሳ “ሃይሶ ፃላዔ ኔ ታፔ ጌዴ ጉዬ ባ! ኔኒ አሳዛፔ ኣቲን ያሳዝ ቆፓካ!” ጊዲ ሃንቂዴስ።

34 ሄሳፌ ጉዬ አሳ ባና ካሊዛይታራ ኢሲፌ ባኮ ያይጊዲ “ታና ካላናስ ደሲዛዴይ ዲኮ ባና ካዶ፤ ባ ማስቃሌ ቶኪዲ ታና ካሎ። * 35 ባ ሼምፖ አሻና ደሲዛዴይ ዳይሳና ሺን ታ ጊሺኔ ታ ሚሺራቾ ቃላ ጊሽ ባ ሼምፖ ዳይሲዛዴይ ወሪካ አሻና። * 36 አሲ አላሜ ኩሜላ ሃሪኮኔ ባ ሼምፖፌ ዳይሲኮ ኢዛ አይ ጎሳኔ? 37 ዋይኮ አሲ ባ ሼምፖ ጊሽ ላሜ ኤካናይ አዚ ዲዜ?”

38 “ሃይሳ ላይማኔ ናጋራንቻ ዩሌታ ጊዶን ዲሼ ታናኒኔ ታ ቃላን ዩላቲዛ አሲ ወሪ ታ አሳ ናይ ታ አዋ ቦንቾራኔ ጌሻ ኪታንቻታራ ዩዛ ዋዴ ኢዛን ዩላታና” ጊዴስ።

9

1 ካሌሊዲካ ዩሱሲ “ታ ኢንቴስ ቱማ ጋይስ፤ ሃይሳን ኤቂዳ አሳፔ ያሳ ካዋቲሉ ዋልቃራ ዩሺን ቤያና ጋካናስ ሃይቆንታ ጋምዓና ኢሲ ኢሲ አሳቲ ዳቲስ” ጊዴስ።

ዩሱሳ ሜዳይ ላሜቲዴስ

2 ኡሱፑን ጋላሳፌ ጉዬ ዩሱሲ ጳፀርሳ ያቆቤኔ ዮሃኒሳ ባናራ ካሌሊ ኤኪዲ ኢሲ ጊታ ዙማ ቦላ ኬዚዴስ። ኢስቲ ባርካ ዲሺን ኢስታ ሲንሳን ኢዛ ሜዳይ ላሜቲ ዋዲዴስ። * 3 ኢዚ ማይዲዳ ማይዶይ ቢታ ቦላ ኦኒካ ማይዶ ሜጨዲ ሄሳ ማላ

* 8:34 ማቶ 10:38፤ ሉቃ 14:27 * 8:35 ማቶ 10:39፤ ሉቃ 17:33፤ ዮሃ 12:25 * 9:2 2ጴጥ 1:17-18

ቦላናስ ዳንዳዮንታ ቦላ ቦቲዳስ። 4 ሄ ዎዴ ኤላሲኔ ሙሴይ ዩሱሳራ ሃሳዬቲሼ ኢስታስ ቤቲዳ።

5 ጳጳርሲ ዩሱሳ “ኣስታማሬ! ኑኒ ሃን ሃይሳን ዲዛኮ ኑስ ሎዎ፤ ኔስ ኢሲ ዳሴ፣ ሙሴስ ኢሲ ዳሴ፣ ቃሴ ኤላሳስ ኢሲ ዳሴ፣ ሄሹ ዳሴታ ኑ ኦሊኮቲ?” ጊዳስ። 6 ዳሮ ባቢዳ ጊሽ ጳጳርሲ ባ ጊዛይሳ ኤሪዲ ጊቤና።

7 ሄራካ ሻራይ ኢስታ ካሚን ሻራ ጊዳራ “ሃይሲ ታ ደሲዛ ታ ናዛኮ! ኢዚ ጊዛ ሲዩቲ” ጊዛ ቃላ ጊሪሲ ዩዳስ። *

8 ሄራካ ኢስቲ ዩሺ ዌሊን ዩሱሳፔ ኣቲን ኦኒካ ሃራ ኣስ ኢስታራ ዳና።

9 ኢስቲ ዙማ ቦላፌ ዳጌ ዎዲሺን ኣሳ ናይ ሃይቆፔ ዳንዳና ጋካናስ ሃይሳ ኢስቲ ቤዩዳይሳ ኦናስካ ዮቶንታ ማላ ኣዛዚዳስ።

10 ኢስቲካ ባስ ዮቲዳ ቃላ ባ ዎዝናን ኦይኪዳ ሺን “ሃይቆፔ ዳንዳ ጉሲ ኣይ ጉሳኮኔ” ጊዲ ባ ጊዳን ሃሳዬቲዳ

11 ቃሴ ኢስቲ ሙሴ ዎጋ ታማርሲዛይቲ “ካሴቲዲ ኤላሲ ያና ኮሼስ ኣዛስ ጊዘ?” ጊዲ ኢዛ ኦይቲዳ። *

12 ዩሱሲ ኢስታስ “ቱሙካ ኤላሲ ካሴቲ ዩዲ ወርሲካ ጊሊሳና። ሂስቲንካ ኣሳ ናይ ዳሮ ዎዩ ኤካናሲኔ ካዴታናስ ቤሴስ ጌቲቲ ፃፌቲዳይሲ ኢንቴስ ኣይ ሚሳቲዜ?”

13 ጊዳ ኣቲን ታ ኢንቴስ ጊዛይ ኤላሲ ጊዲኮ ዩዳስ ሺን ኣሳይካ ኢዛ ጊሽ ፃፌቲዳ ማላ ባና ኮሼዳ ማላ ኢዛ ቦላ ኦሊዳስ” ጊዳስ።

ዩሱሲ ኢታ ኣያናይ ኦይኪዳ ኢሲ ና ፓሊዳስ
(ማቶ 17:14-20፤ ሉቃ 9:37-43)

14 ዳጌ ጊዳን ኣቲዳ ዩሱሳ ካሊዛይታኮ ኢስቲ ሲሚ ዩሺን ዳሮ ኣሳይ ኢስታ ጊዳሊን ሙሴ ዎጋ ታማርሲዛይቲ ኢስታራ ፓላሚቲዛይሳ ቤዩዳ። 15 ዳሬይ ኢዛ ዳሚዳ ማላ ማላሊቲዲ ሳሮካናስ ኢዛኮ ዎዲዳስ።

16 ኢዚካ ኢስታ “ኢንቴ ኢስታራ ኣዛ ጊሽ ፓላሚቲቲ?” ጊዲ ኦይቲዳስ።

17 ኣሳ ጊዳፌ ኢሳዳይ “ኣስታማሬ! ቱና ኣያናይ ኢዛን ጌሊን ዱና ዱዲዳ ታ ና ዳይሳ ታ ኔኮ ኤካ ያዲስ። 18 ኣያናዚ ዳንዲዛ ዎዴ ቦላፌ ዩጌስ፤ ዱናራ ጎፖንቶ ኬሲ ኬሲ ዩጌስ፤ ኣቻካ ጋርጨስ፤ ኣሳቲሳካ ዘዲሴስ። ቱና ኣያና ኬሴቶ ጋዳ ኔና ካሊዛይታ ታ ኦይቲን ኢስቲካ ዳንዳዩቤቲና” ጊዳስ።

* 9:7 ማቶ 3:17፤ ማር 1:11፤ ሉቃ 3:22 * 9:11 ሚሊ 4:5፤ ማቶ 11:14

19 ዩሱሱስ ኢስታስ ዛሪዲ “ኢንቴኖ አማኖንታ ዩሌታቶ፣ አይዴ ጋካናስ ታ ኢንቴናራ ዳኔ? ቃሴ አይዴ ጋካናስ ታ ኢንቴና ዳንዳያኔ? እኔ ናዛ ሃ ኤሂቲ” ጊዴስ። 20 አሳይካ ናዛ ኢዛኮ ኤሂዴስ፣ ቱና አያናይ ዩሱሳ ቤዪዳ ማላ ናዛ ሄራካ ጋዴን ፔንዴርሲዲ ኮኮርሲዲኔ ዲናራ ጎፖንቶ ጮፑ ሂስቲዴስ።

21 ዩሱሱ ናዛ አዋ “ሃይሲ ሃርጌይ ኢዛ አዪዴሳፔ ኦይኪዴ?” ጊዴስ። ናዛ አዋይካ “ናቴላፌ ደሚዲ” ጊዴስ። 22 “ኢዛ ዋዳናስ ኮይዲ ዳር ዋዴ ታማንካ ሃላንካ ዩጌስ። ኔስ ዳንዳዬቲኮ ኑስ ሚሼታኔ ኑና ማዳ” ጊዴስ።

23 ዩሱሱ ቃሴ “ኔስ ዳንዳዬቲኮ ጋይ? አማኒዛዴስ ዉሪካ ዳንዳዬቲስ” ጊዴስ።

24 ናዛ አዋይ ሄራካ “ታ አማናይስ ሺን ታ አማናይ ላፋ፣ ታና ማዳሪኪ?” ጊዲ ዋሲዴስ።

25 አሳይ ዋጫሚሽ ቡሬቲ ኤኪዲ ኢዛኮ ዪዛይሳ ዩሱሲ ቤዪዲ “ሃይሶ ቱሌኔ ዲዴ አያናዙ! ሃይሳ ናዛፔ ኬዛ፣ ኔ ቃሴ ሲማዳ ጌሎንታ ማላ ታ ኔና አዛዛይስ” ጊዲ ቱና አያና ሴሪዴስ።

26 ቱና አያናዚካ ኬሂ ዋሲዴስ፤ ናዚካ ኬሂ ቃኬቲዳፔ ጉዬ ናዛፔ ኬዚዴስ። ዳርቲ ሃይቂዴስ ጋና ጋካናስ ናዚ አሃ ሚሳቲዴስ።

27 ጊዴ ኣቲን ዩሱሲ ናዛ ኩሼ ኦይኪ ዴንሊዴስ። ናዚካ ዴንዲ ኤቂዴስ።

28 ዩሱሱ ሶ ጌሊዳፔ ጉዬ ኢዛ ካሊዛይቲ “ኑ ኢዛፔ ቱና አያና ኬሳናስ ኣዛስ ዳንዳዪቤይኮኒ?” ጊዲ ኢዛ ኦይቺዳ።

29 ኢዚካ ኢስታስ “ሃይሳ ማላይ ኬዛና ዳንዳዪዛይ ዋሳኒኔ ፆማን ፃላ” ጊዴስ።

**ዩሱሱ ባ ሃይቆ ጊሺኔ ባ ዴንዶ ጊሽ ቃሴካ ዮቲዴስ
(ማቶ 17:22-23፤ ሉቃ 9:43-45)**

30 ሄፔ ዴንዲ ጋሊላ ባጋራ ኣጂ ቢዳ። ዩሱሱ ባ ዲዛሶ ኦኒካ ኤራና ማላ ኮይቤና። 31 ጋሶይካ ዩሱሱ ባና ካሊዛይታስ “አሳ ናይ አሳ ኩሼን ኣጂ ኢሜታና ኢስቲካ ኢዛ ዋዳና፣ ሄቫንሶ ጋላሳፌ ጉዬ ኢዚ ዴንዳና” ጊዲ ኢስታ ታማርሲዛ ጊሻሳ። 32 ጊዴ ኣቲን ኢዚ ጊዛይሲ ኢስታስ ጌሊቤና፤ ኢዛ ኦይቻናሰካ ባቢዳ።

**ኡባፌ ኣጂዛይ ኦኔ?
(ማቶ 18:1-5፤ ሉቃ 9:46-48)**

33 ሄሳፌ ጉዬ ቂፊርናሆሚ ቢዳ። ኢዚ ኬፌ ጌሊዲ “ኢንቴ ዪሼ ኦጌ ቦላ ኣዛ ጊሽ ፓላሜቲዴቲ?” ጊ ኦይቺዴስ።

34 ኢስቲ ቃስ ኦጌ ቦላ “ኑ ጊደን ኑፔ ኡባፌ ኣጲዛይ ኦኔ?” ጊዲ ፓላማቲዳ ጊሽ ወሪካ ጮፀ ጊዳ። *

35 ኢዚ ኡቲዳፔ ጉዬ ታማኔ ናምባታ ያይጊዲ “ኮይሮ ጊዳና ኮዩዛዳይ ኡባፌ ወርሴሊኔ ኡባታስ ኣሸካራ ጊደ” ጊዳስ። *

36 ቁ ጉላ ና ኤሂዲ ኢስታ ጊደን ኤሲዳስ። ኢዲሚዲኔ

37 “ሃይታ ጉላ ናይታፔ ኢሳዴ ታ ሱንላን ሞኪ ኤኪዛዳይ ታናካ ሞኪ ኤኬስ። ታና ሞኪ ኤኪዛዳይ ወሪ ታና ፃላላ ጊደንታ ታና ከቲዳይሳካ ሞኪ ኤኬስ” ጊዳስ። *

ኑና ኢደንታይ ወሪ ኑ ባጋ
(ሉቃ 9:49-50)

38 ዮሃንሲካ “ኣስታማሬ! ኢሳዳይ ኔ ሱንላን ዳይዳንሊ ኬሲሺን ኑ ቤይዶስ። ኢዚ ኑና ካሎንታ ጊሽ ኬሶንታ ማላ ዲጊደስ” ጊዳስ።

39 ዬሱሲ ቃሴ “ዲጎፍቴ፤ ኦኒካ ታ ሱንላን ማላታ ኦሊዲ ኤሶቲዲ ታ ቦላ ኢታ ሃሳያናስ ዳንዳዬና። 40 ኑናራ ኤቁቶንታይ ወሪ ኑናራ ዳስ። * 41 ታ ኢንቴስ ቱሙ ጋይስ፤ ኢንቴ ቲዬቲዳ ኪርሰቶሳስ ጊዲዳ ጊሽ ታ ሱንላን ኢሲ ሞንጫ ሃላ ኢንቴና ኡሺዳዳይ ወሪ ባ ኦሶይስ ሞጋ ጳዬና። *

ኣሳስ ጳ.ጴ ጊዳናፔ ናጌቴላ
(ማቶ 18:6-9፤ ሉቃ 17:1-2)

42 “ሃይታ ታና ኣማኒዛ ሃ ጉላታፔ ኢሳዳስ ጳ.ጴ ጊዲዛይ ወሪ ዳዖ ሞፃ ሹቺ ኢዛ ቆጴን ቃሹቲን ዳጌ ኣባ ጊደ ኦሌቲዳኮ ኢዛስ ሎዖ ጊዳና። 43 ሃሳ ጊሽ ኔ ኩሼይ ኔና ባሌሊኮ ኔፔ ቃንፃ ዬጋ፤ ናምቡ ኩሼራ ዳዳ ጌዴ ጋናሜ ታማን ኔ ባናይሳፌ ኩሼ ዳዳ ጊዳዳ ጌዴ ዳዖን ጌሎይ ኔስ ሎዖ ጊዳና። * 44 ጋናሜን ጉፁኔይ ሃይቁና፣ ታማይኔ ቶዔና። * 45 ኔና ኔ ቶሆይ ባሌሊኮ ኔፔ ቃንፃ ዲጋ፤ ናምቡ ቶሆራ ዳዳ ጌዴ ጋናሜ ታማን ዬጌታናፔ ኔ ሞቤ ጊዳዳ ጌዴ ዳዖሶ ጌሎይ ኔስ ሎዖ። 46 ጋናሜን ጉፁኔይ ሃይቁና፣

* 9:34 ሉቃ 22:24 * 9:35 ማቶ 20:26-27፤ 23:11፤ ማር 10:43-44፤ ሉቃ 22:26 * 9:37 ማቶ 10:40፤ ሉቃ 10:16፤ ዮሃ 13:20 * 9:40 ማቶ 12:30፤ ሉቃ 11:23 * 9:41 ማቶ 10:42 * 9:43 ማቶ 5:30 * 9:44 ኢሲ ኢሲ ገሻ ማፃፋቲ ፓይዶ 44 ቦላ ዲዛ ቆፋ ጉጃቴስ፤ ቆፋዚካ ፓይዶ 48 ቦላ ዲዛይሳ ሚሳቴስ።

ታማይኔ ቶዔና። † 47 ኔና ኔ ኣይፌይ ባሌሊኮ ዎጫ ኬሳዳ ኔፔ ዲጋ፤ ናምቡ ኣይፌራ ዳዳ ጌዳ ጋናሚን ዩጌታናፔ ኢሲ ኣይፌራ ያሳ ካዎቴሳ ጌሎይ ኔስ ሎዎ። * 48 ጋናሚን ጉፁኔይ ሃይቁና ታማይኔ ቶዔና። *

49 “ቡር ኣሲ ዉሪ ታማን ፓጩታና።

50 “ማጺኔይ ሎዎ፤ ጊዶ ኣቲን ማጺኔይ ባ ማጺኔቴሳ ዩዲኮ ኢንቴ ዎስቲ ኢዛ ማልዎ ኤራኔ? ኢንቴ ኣሳቴሳን ማጺኔይ ዳዎ። ኢንቴ ኢንቴ ጊዶን ደሴቲቴ” ጊዳስ። *

10

ማቾ ኣንጂ ዩዳናስ ቤሴና

(ማቶ 19:1-12፤ ሉቃ 16:18)

1 ዩሱሲ ሄፔ ዳንዲዲ ጌዳ ዩሁዳ ጌቲተዛ ዳሬኔ ዮርዳናሴ ቫፋፔ ፒንሳን ዲዛ ዳሬ ቢዳስ። ዳሬይካ ቃሴ ኢዛ ዩዩ ኣጂን ኢዚ ካሴ ባ ኦሊዛ ማላ ኣሳ ታማርሲዳስ።

2 ኢሲ ኢሲ ፋርሳዌቲ ኢዛኮ ዩዲ “ኣሲ ባ ማቾ ኣንጂ ዩዳናስ ቤሴዜ?” ጊዲ ኢዛ ፓጩ ኦይሾ ኦይቺዳ።

3 ኢዚካ ኢስታስ “ሙሴይ ኢንቴና ኣይ ጊ ኣዛዚዳ?” ጊዲ ዛሪ ኦይቺዳስ።

4 ኢስቲካ ኢዛስ “ሙሴይ ታ ኢዛ ኣንጂ ዩዳዲስ ጊዛ ዋራቃታ ፃፊ ኢሚዲ ኣንጂ ጊዳስ” ጊዳ። *

5 ዩሱሲካ ዛሪዲ ኢስታ “ሙሴይ ሃይሳ ማላ ዎጋ ፃፊዳይሲ ኢንቴ ዎዝናይ ሚኒዳ ጊሻሳ። 6 ጊዶ ኣቲን ኮይር ያሲ ሜጲሼ ማጫኔ ኣዳ ኦሊ ሜጲዳስ። * 7 ሄሳ ጊሽ ኣሲ ባ ኣዋኔ ባ ኣዮ ኣጊዲ ባ ማቺራ ዋፃቴስ። 8 ናምዓይ ኢሲ ኣሾ ጊዳቴስ፤ ሄሳ ጊሽ ኢስቲ ናምዓይ ኢሲናፔ ኣቲን ናምቡ ዳቴና። 9 ሄሳ ጊሽ ያሲ ጋሊ ዋፃዳይታ ኣሲ ሻኮፎ።” ጊዳስ።

10 ቃሴካ ኢስቲ ሶ ጌሊን ኢዛ ካሊዛይቲ ሄ ዮዎዛ ጊሽ ዛሪ ኢዛ ኦይቺዳ። 11 ኢዚ ኢስታስ “ኣኒካ ባ ማቾ ኣንጂ ዩዲዲ ሃራ ማጫስ ኤኪኮ ሄ ማጫሳይ ቦላ ላይማ ኦሴስ። 12 ማጫሳያካ ባ ኣዚና ኣጋዳ ሃራ ኣዳ ጌሊኮ ኢዛካ ላይማታዉስ” ጊዳስ። *

† 9:46 ኢሲ ኢሲ ጊሻ ማፃፋቲ ፓይዶ 46 ቦላ ዲዛ ቆፋ ጉጃቴስ፤ ቆፋይካ ፓይዶ 48 ቦላ ዲዛይሳ ሚሳቴስ። * 9:47 ማቶ 5:29 * 9:48 ኢሳ 66:24 * 9:50 ማቶ 5:13፤ ሉቃ 14:34-35 * 10:4 ዛሬ 24:1-4፤ ማቶ 5:31 * 10:6 ሜጲ 1:27፤ 5:2 * 10:12 ማቶ 5:32፤ 1ቆር 7:10-11

ዩሱሲ ጉላ ናይታ ኣንጂዴዳስ
(ማቶ 19:13-15፤ ሉቃ 18:15-17)

13 ዩሱሲ ባ ኩሼ ዋላና ማላ ኣሳይ ናይታ ኢዛኮ ኤሂዳስ። ኢዛ ካሊዛይቲ ቃሴ ኤሂዳ ኣሳ ቦላ ሃንቁቲዳ። 14 ዩሱሲ ሄሳ ቤዪ ሃንቁቲዳ “ናይቲ ታኮ ዩቶ፤ ዲጎፍቲ፤ ፆሳ ካዎቴሉ ሃይታንታ ማላሳ። 15 ታ ኢንቴስ ቱሙ ጋይስ፤ ፆሳ ካዎቴሉ ሃይሳ ጉላ ናይታ ማላ ኤኮንታዳይ ኢዚን ሙሉካ ጌሌና” ጌዴስ። * 16 ናይታ ኢዲሚዲ ኢስታ ቦላ ባ ኩሼ ዋሊዲ ኣንጂዴዳስ።

ኢሲ ዲሬ ኣዳ
(ማቶ 19:16-30፤ ሉቃ 18:18-30)

17 ሄፔ ቡሮ ኦጌ ኬዚሺን ኢሳዳይ ዎዲሼ ኢዛኮ ጋኪዲኔ ኢዛ ሲንላን ጉልባቲዲ “ኪያ ኣስታማሬንቶ! ታኒ ሜርና ዴዎ ዴማና ማላ ኣይ ኦላና ታስ ቤሲዜ?” ጌ ኦይቲዳስ።

18 ዩሱሲካ “ኣዛስ ታና ኪያ ጋይ? ኢሲ ፆሳፊ ኣቲን ኪያይ ባ” ጌዴስ። 19 “ኒኒ ኣዛዘታ ኤሬይ? ‘ዎጶፓ፤ ላይማቶፓ፤ ካይሶቶፓ፤ ዎርዶ ማርካቶፋ፤ ኣስ ባሌላፋ፤ ኔ ኣዎኔ ኔ ኣዮ ቦንቻ’ ጌዛይታ” ጌዴስ። *

20 ኣዳዚካ ዛሪዲ “ኣስታማሬ! ታ ሃይታ ዉርሳ ናቴላፊ ኦይካዳ ናጋዲስ” ጌዴስ።

21 ዩሱሲ ኢዛ ያሊዲኔ ደሲዲ “ሂስቲኮ ሃዒ ኔስ ኢሲ ሚሽ ፓጩስ። ባዳኔ ኔስ ዲዛ ዉርሳ ባይዛ፤ ሚሻ ማንቆታስ ኢማ፤ ኔኒ ሳሎን ሸቁዳ ሚሽ ዴማንዳሳ፤ ሂስታዳኔ ሃያ ታና ካላ” ጌዴስ።

22 ኣዳዚካ ሄሳ ሲይዲ ዳር ዪሎቴዴስ። ኢዛስ ዳር ሃርይ ዲዛ ጊሽ ሙዞቲሼ ቢዴስ።

23 ዩሱሲ ዩሺ ኣሊ ያሊዲ ባና ካሊዛይታ “ዱሬታስ ፆሳ ካዎቴሉ ጌሎይ ኣይ ማላ ዴዎ!” ጌዴስ።

24 ኢዛ ካሊዛይቲካ ኢዛ ሃሳያን ማላሌቲዳ። ዩሱሲ ቃሴ ዛሪዲ “ናይቶ! ፆሳ ካዎቴሉ ጌሎይ ኣይ ማላ ዴዎ ሚሼ!

25 ዲሬይ ፆሳ ካዎቴሉ ጌላናይሳፊ ጋሜላይ ናርፔ ሉኮራ ኣቆናይሲ ካዉያና!” ጌዴስ።

26 ኢዛ ካሊዛይቲካ ዳርሲ ማላሌቲዲ ባ ጌዶን ኢሶይ ኢሳ “ሂስቲን ኦኒ ኣታና ዳንዳዩዜ?” ጌዳ።

27 ዩሱሲ ኢስታ ያሊዲኔ “ሃይሲ ኣሳስ ዴንዳዩቴና፤ ፆሳ ማታን ጌዲኮ ሄሳ ማላ ጌዴና። ፆሳስ ዉሪካ ዳንዳዩቴስ” ጌዴስ።

* 10:15 ማቶ 18:3 * 10:19 ኬሳ 20:12-16፤ ዛሬ 5:16-20

28 ጳጳሮሲ ቃሴ “ሄኮ፤ ኑኒ ወርሲካ ኣጊዲ ነና ካሊዶስ” ጊዳስ።

29 ዩሱሲካ ዛሪዲ “ታ ኢንቴስ ቱሙ ጋይስ፤ ታ ጊሺኔ ሚሺራቾ ቃላ ጊሽ ጊዲ ባ ኬጱ፤ ዋይኮ ባ ኢሻታ፤ ዋይኮ ባ ሚቹታ፤ ዋይኮ ባ ኣዮ፤ ዋይኮ ባ ኣዋ፤ ባ ናይታ፤ ዋይኮ ባ ጋዴ ኣጊዲ ኣስ ወሪ፤

30 ሃይሳ ሃ ዋዴዛን ሃዒ ጎዴቴፋራ ኬፋታ፤ ኢሻታ፤ ሚቹታ፤ ኣዬታ፤ ናይታኔ ጋዴካ ፃቱ ኩሺ ኣሊ ኤኮንታይኔ ቡሮ ያና ኣላሚዛንካ ማርና ዴዎ ላቶንታዴይ ዴና። 31 ጊዶ ኣቲን ሲንፋቲዳ ዳሮቲ ጉዬታና፤ ጉዬቲዳይቲ ሲንፋታና” ጊዳስ። *

ዩሱሲ ባ ሃይቂ ዴንዳናይሳ ሃቐንፋ ዮቲዴስ

32 ኢስቲ ዩሩሳላሚ ኤፊዛ ኦጌ ቦላ ዲሺን ዩሱሲ ኢስታፊ ሲንጼ ሲንጼ ቤስ። ኢዛ ካሊዛይቲ ኢዛ ቡሳን ማላሌቲዳ። ሃንኮ ኢዛ ጌዶን ዲዛ ኣሳይ ቃስ ኢዛስ ባቢዴስ። ቃሴካ ታማኔ ናምዓታ ዴሬዛፔ ዴማ ሻኪዲ ባ ቦላ ኣዚ ጋካናኮኔ ኢስታስ ሂዘጊ ዮቲዴስ፤ 33 “ኑኒ ዩሩሳላሚ ኬዛና፤ ኣሳ ናይ ቁሴታ ሃላቃታሲኔ ሙሴ ዋጋ ታማርሲዛይታስ ኣጂ ኢሚታና፤ ኢስቲካ ኢዛ ቦላ ሃይቆ ፒርዳ ፒርዳና ኤሬ ኣሳስ ኣሊ ኢማና። 34 ኢዛ ቦላ ቂጂ ካዳና፤ ኢዛ ቦላ ጨታና፤ ኢዛካ ጋራፋና ነቐና ሺን ኢዚ ሃቐን ጋላሳፊ ጉዬን ሃይቆፔ ዴንዳና።”

ያቆቤይኔ ዮሃንሲ ዋሲዳ ዋሳ (ማቶ 20:20-28)

35 ቃሴ ዛቢደሳ ናይቲ ያቆቤይኔ ዮሃንሲ ኢዛኮ ሸቂዲ “ኣስታማሬ! ኑኒ ነና ዋሲዳይሳ ኔ ኑስ ወርሳ ኦፋና ማላ ኑ ኮዮስ” ጊዳ።

36 ኢዚካ ኢስታስ “ታ ኢንቴስ ኣይ ኦፋና ማላ ኮዬቲ?” ጊዳስ።

37 ኢስቲካ “ኑኒ ኔ ካዋቴፋ ቦንቾ ዋዴ ኑፔ ኢሳዴይ ኔ ኡሻቻን ኢሳዴይ ኔ ሃዲርሳን ኡታና ማላ ኑስ ኤሮ ጋርኪ?” ጊዳ።

38 ዩሱሲካ “ኢንቴ ኦይቹዛይሳ ኤሬኬታ። ታኒ ኡያና ኡሻ ኡያናሲኔ ታኒ ፃማቂቲዛ ፂንቃታ ፃማቂታናስ ዳንዳያንዴቲ?” ጊዳስ። * 39 ኢስቲካ ዛሪዲ “ኤ፤ ዳንዳዮስ” ጊዳ። ዩሱሲካ “ታ ኡዬዛ ኡሻ ኢንቴ ኡያናኔ ታ ፃማቂቲዛ ፂንቃታ ኢንቴ ፃማቂታና። 40 ጊዶ ኣቲን ታ ኡሻቻራ ዋይኮ ታ ሃዲሪሳራ ኡቴሊ ያሲ ኢስታስ ጊሲዳይታስ ኣቲን ታ ኢማና ሚሽ ጊዴና” ጊዳስ።

* 10:31 ማቶ 20:16 * 10:38 ሉቃ 12:50

41 ታማቲ ሄሳ ሲይዱ ያቆቤኔ የሃኒሳ ቦላ ሃንቁቲዳ።
 42 ዩሱሲካ ኢሲ ቦላ ሺሺዱ “ዳሬ ሃላቃ ጌቴተዛይቲ ዳሬ ሃሪዛይሳ ማላ ኢስታ ሹሜቲ ኢስታ ቦላ ባ ጎዳቴላ ቤሲዛይሳ ኢንቴ ኤሬታ። 43 ጊዶ ኣቲን ኢንቴ ጊዶን ጊታ ጊዳና ኮዩዛ ኡባይ ኣሸካራ ጊዶ። * 44 ሲንጮ ኣቆና ኮዩዛይ ወሪካ ኡባሰ ኣይሌ ጊዶ። 45 ኣሳ ናይ ጊዱኮ ኣሳሰ ኦላናሲኔ ባ ሹምፖ ዳርታ ጊሽ ኣሉ ኢማናሰ ዩዳሰ ኣቲን ኣሴ ኦሲሳናሰ ዩቤና።” ጊዳሰ።

ዩሱሲ ቆቁ ባርዳሞሳ ኣይፌ ፓሊዳሰ
 (ማቶ 20:29-34፤ ሉቃ 18:35-43)

46 ሃፔ ጌዳ ያርኮ ቢዳ። ዩሱሲኔ ኢዛ ካሊዛይቲ ሃራ ዳር ኣሳታራ ኢያርኮፌ ኬዚሺን ጸሞሳ ና ባርዳሞሳ ጌቴተዛ ኣይፌ ቆቁይ ኦጌ ቦላ ኡቲዱ ዋሴሰ። 47 ኢዚካ ዩዛይ ናዚሬቴ ዩሱሳ ጊዱዳይሳ ሲይዱ “ዳወቴ ና ዩሱሳ ታና ማራ” ጊዱ ኬሂ ዋሲዳሰ።

48 ዳርቲ ኢዚ ጮፀ ጋና ማላ ሃንቁዳ፤ ጊዶ ኣቲን ኢዚ “ዳወቴኖ! ታና ማራ” ጊዱ ኬሂ ዋሲዳሰ።

49 ዩሱሲካ ኤቁዱ “ኢዛ ሃ ያይገጌቴ” ጊዳሰ። ኢስቲካ ቆቁዛ “ኣይኮይ ባ ዳንዳ ኔና ያይጌሰ” ጊዳ። 50 ኢዚካ ባ ማይዖ ቃሪ ዩጊዱ ፑሱኩ ጊ ዳንዱ ኤቁዱ ዩሱሳኮ ዩዳሰ።

51 ዩሱሲካ “ታ ኔሰ ኣይ ኦላና ማላ ኮያይ?” ጊዳሰ። ቆቁዚካ “ኣስታማሬንቶ! ታ ያላናዉ ኮያይሰ” ጊዳሰ።

52 ዩሱሲካ ዛሪዱ “ባ ኔና ኔ ኣማኖይ ፓሊዳሰ” ጊዳሰ። ሄራካ ኢዛ ኣይፌይ ያሊዳሰ። ኢዚካ ዩሱሳ ካሊ ቢዳሰ።

11

ዩሱሲ ጊታ ቦንቾራ ዩሩሳላሜ ጌሊዳሰ
 (ማቶ 21:1-11፤ ሉቃ 19:28-40፤ ዮሃ 12:12-19)

1 ኢስቲ ጌዳ ዩሩሳላሜን ዳብራዛይቲ ጌቴተዛ ዙማ ኣቻን ዲዛ ቤቴፋጌኔ ቢታኒያ ጌቴተዛሶ ማቲዳ ዎይ ዩሱሲ ባና ካሊዛይታፔ ናምዓታ ሂዘጊ ከቲዳሰ። 2 “ጌዳ ኢንቴ ሲንላን ዲዛ ጉታዮ ቢቴ። ኢንቴ ሄ ጌሊዳ ማላ ሃን ኣሲ ቶጊ ኤርንታ ቃሾን ዲዛ ሃራ ጉቴ ኢንቴ ዳማና፤ ቢርሺዱ ኢዛ ሃ ኤኪ ዩቴ። 3 ኦኒካ ኢንቴና ‘ሃይሳ ኣይሰ ኦሌቲ?’ ጊኮ ጎዳሰ ኮሼሰ ጊዱ ዮቲቴ፤ ኢዚካ ኢንቴሰ ኤሶን ዛሪ ዩዳና” ጊዳሰ።

* 10:43 ሉቃ 22:25-26

4 ኢስቲካ ቢዲ ኢሲ ከፋ ካሪን ኦጌ ቦላ ቃሾቲ ዲዛ ሃሪ ጉቴ ዳሚዲ ቢርሺዳ። 5 ህን ኤቁዳ ኢሲ ኢሲ አሳቲ “ሃሪ ጉቴዛ አዛስ ቢርሺቲ?” ጊ ኦይቸዳ።

6 ዩሱሳ ካሊዛይቲ ዩሱሲ ኢስታስ ጊዳ ማላ አሳታስ ዮቲን ኤሮ ኤኪ ቦቲ ጊዳ። 7 ጉቴዛካ ዩሱሳኮ ኤሂዲ ባ ማይዖ ኢዛ ዘኮ ቦላ ዩጊን ዩሱሲ ኢዛ ቶጊዳስ። 8 ዳሮ አሳይ ባ ማይዖ ኬሲ ኬሲ ኦጌ ቦላ ሚጨዳስ። ባጋ አሳይ ጨሊላ ሚላ ሃይላ ቃንፂ ቃንፂዲ ኦጌ ቦላ ላሊዳስ። 9 ዩሱሳፕ ሲንላራኔ ጉዩራ ዲዛ አሳይ ቃላ ቶቁ ሂስቲዲ

“ሆሳና፤

ጎዳ ሱንላን ዪዛይይ አንጃቲዳዳ።

10 ሃና ዪዛራ ኑ አዋ

ዳወቴ ካዎቴላያ አንጃቲዳሮ፤

ሆሳና!

ቦላ ሳሎን ያሲ ቦንቸቶ”

ጊሼ ዋሲዳስ።

11 ዩሱሲ ዩሩሳላሜ ጋኪዲ ሃሳፊካ ያሳ ከሌ ጌሊዳስ። ህ ህራን ዲዛይሳ ወርሲ ፃሊዲ ጋይይ ቃሚዳ ጊሽ ታማኔ ናሞባታራ ጌዴ ቢታኒያ ከዚዳስ።

ዩሱሲ ቃንጊዳ ባላሴ ሚላዮ

(ማቶ 21:18-19)

12 ዋንቴላ ጋላስ ኢስቲ ቢታኒያፕ ከዚ ቢሺን ዩሱሲ ጋፊዳስ።

13 ኢዚ ኢሲ ሃይላ ጨሊሊዳ ባላሴ ጌቴቲዛ ሚላ ሃሆን ቤዩዲ አይፊይ ዳናኮኔ ጊዲ ኢዚኮ ዪዳስ። ጊዶ አቲን ባላሴ ሚላ አይፎንታ ዎዳ ጊዲዳ ጊሽ ሃይላፊ አቲን ኢሲ አይፊካ ኢዚፕ ዳሚቤና። 14 ህሳ ጊሽ ሚላዮ “ሃኒፊ ጉዩ ሚርናስ ኦኒካ ኔፕ አይፊ ዋፖ!” ጊዳስ። ኢዛ ካሊዛይቲካ ኢዚ ጊዛይሳ ሲዪዳ።

15 ጌዴ ዩሩሳላሜ ቢዳ፤ ህፕካ ጌዴ ያሳ ከሌ ጌሊዲ ህን ባይዚዛይታኔ ሻሚዛይታ ከሲ ጎዶ ኦይኪዳስ። ሚሼ ላሚዛይታ ፃራጳዛኔ ሃራጳ ባይዚዛይታ ኦይዴ ጉፋንላ ጉፋንላ ዩጊዳስ።

16 አኒካ አይ ሚሽ ቶኪዲ ያሳ ከሌ ጊቤ ጊዶራ አቶንታ ማላ ዲጊዳስ። 17 ኢስታካ ታማርሲሼ “ታ ከላ ዳሬ ኡባሰ ዋሳ ከሌ ጊዳና ጌቴቲ ፃፊቲቤኔ? ጊዶ አቲን ኢንቴ ቃሴ ካይሶታ ጎንጎሎ ከሲዳታ” ጊዳስ። *

* 11:17 እሳ 56:7፤ ኤር 7:11

18 ቁሴታ ሃላቃቲኔ ሙሴ ዋጋ ታማርሲዛይቲ ሃሳ ሲይዲ ኢዛ ዋስቲ ቆይሳናኮኔ ኦጌ ኮሽ ኦይኪዳ። ጊዶ ኣቲን ዳሬይካ ኢዛ ቲሚርቲዛን ማላሌቲዳ ጊሽ ኢዛሰ ባቢዳ።

19 ኢሰቲካ ጋዴይ ቃሚን ካታማይፔ ኬዚ ቢዳ።

20 ዋንቴላ ጋላሰ ማላዶ ኢሰቲ ኦጌሪ ኣቋ ቢሽን ባላሴ ማላያ ፃጶፔ ሜሊዳሮ ቤዱዳ። 21 ዮዖዚ ኢዛ ዋዝናን ኣኬኬቲን ጳፅርሲ ዬሱሳ “ኣስታማሬ! ሄኮ፣ ሃና ኔ ቃንጊዳ ባላሴያ ማላዱስ” ጊዳሰ።

22 ኢዚካ ዛሪዲ “ዖሳ ኣማንቴ። 23 ታ ኢንቴሰ ቱሙ ጋይሰ፤ ‘ኣኒካ ሃይሳ ዙማዛ ኔ ቆቃሌታዳ ጌዴ ኣባን ጌላ’ ጊዛኮኔ ሃሳካ ዋዝናን ሲቆንታ ኣማኒዳኮ ኢዛዳሰ ሃናና። * 24 ሃሳ ጊሽ ኢንቴ ዋሳን ኦይቹዳዝ ወርሲ ኤኪዳ ማላ ኣማኒኮ ኢንቴሰ ሃናና። 25 ሃሳሶካ ኢንቴ ዋሳሰ ኤቁዛ ዋዴ ኢንቴ ሳሎ ኣዋይ ኢንቴ ናጋራ ኣቶ ጋና ማላ ኢንቴካ ኢንቴና ቆሃዳይታ ናጋራ ወርሲ ኣቶ ጊቴ። 26 ኢንቴ ኣቶ ጎንታ ኢዳኮ ኢንቴ ሳሎ ኣዋይካ ኢንቴ ናጋራ ኣቶ ጌና።” ጊዳሰ። **

27 ቃሴካ ዬሩሳላሚ ዱዳ። ዬሱሲ ዖሳ ከሌ ካሬ ጊዶን ጌዴኔ ሃኔ ዩዬቲሽን ቁሴታ ሃላቃቲ፣ ሙሴ ዋጋ ታማርሲዛይቲኔ ዳሬ ጨማቲ ኢዛኮ ሽቂዳ፣ 28 “ሃይሳ ኔ ኦሊዛይ ኣይ ጎዳቴላራ? ሃይታ ኔ ኦላና ማላ ሃይሳ ማላ ጎዳቴላ ኔሰ ኦኒ ኣሚዳ?” ጊዳ።

29 ዬሱሲካ ኢሰታሰ ዛሪዲ “ኣኔ ታካ ኢንቴና ኢሲ ኦይሾ ኦይቻይሰ ኢንቴካ ታሰ ዛሪኮ ታካ ሃ ዮዖታ ኣይ ጎዳቴላራ ኦሊዛኮኔ ኢንቴሰ ዮታና። 30 ዮሃኒሳ ዲንቃቴይ ዖሳፌዬ? ኣሳፔ? ኣኔ ታሰ ዛሪቴ” ጊዳሰ።

31 ኢሰቲካ ባ ጊዶን ኢሶይ ኣሳራ “ኑ ሳሎፔ ጊኮ ኢዚ ኑና ሂሰቲን ኣዛሰ ኢዛ ኣማኒቤይኬቲ?” ጋና፤ 32 ‘ኑ ኣሳፔ’ ጊኮ” ዮሃኒሲ ቱሙ ናቤ ጊዲዳይሳ ዳሬይ ወሪ ኣማኒዛ ጊሽ ሃሳሶ ጋና ባቢዳ።

33 ሃሳ ጊሽ “ኑ ኤሮኮ” ጊዲ ዬሱሳሰ ዛሪዳ። ዬሱሲካ “ሂሰቲኮ ታ ሃይታ ኣዛ ጎዳቴላራ ኦሊዛኮኔ ታካ ኢንቴሰ ዮቲኬ” ጊዳሰ።

* 11:23 ማቶ 17:20፤ 1ቆሮ 13:2 * 11:26 ኢሲ ኢሲ ገሻ ማፃፋቲ ፓይዶ 26 ቦላ ዲዛ ቆፋ ጉጃቴሰ። * 11:26 ማቶ 6:14-15

12

ዎይኔ ሚሊ ቶኪዛ ጎሻ አሳታ ለሚሶ
(ማቶ 21:33-46፤ ሉቃ 20:9-19)

1 ቃሴ ኢስታሰ ለሚሶራ ዮተሼ “ኢሳዳይ ባ ዎይኔ ሚሊ ቶኪዳሰ። ኬላ ዩሼ አሉ ኬሊዳሰ፤ ዎይኔ ሚላ አይፌ ጉምዓና ኦላ ቦኪዳሰ። ናጌ ኬሌካ ኬዲዳሰ። ሄሳፌ ጎሻንቻታሰ ኪራ ኢሚዲ ሃራ ዳሬ ቢዳሰ። 2 ሚላይ አይፊዛ ዎዴ ዎይኔ ሚላ አይፌ ኤካዳ ያ ጊዲ አሸካራታፔ ኢሳዳ ጎሻንቻታኮ ዩዲዳሰ። 3 ጎሻንቻቲ አሸካራዛ ኦይኪ ሾጪዲ ጮ ሚላ ኩሼ ዩዲዳ። 4 ናምዓንሐካ ሃራ አሸካራ ዩዲዳሰ። ጎሻንቻቲ ሃዲካ አሸካራ ኦይኪዲ ኢዛሰ ሁዔታራ ቆዒዲኔ ካወሺዲ ዛሪ ዩዲዳ። 5 ሃዲካ ዛሪዲ ሃራ አሸካራ ዩዲዳሰ። ሄ ዩዳይሳካ ዎዲዳ፤ ሃራ ዳርታ ጊዳፌ ኢሲ ኢሲ አሳታ ቆዲዳ፤ ባጋይታ ዎዲዳ።

6 “ሃዲካ ኪቶንታ አተዛ ሃራይ ዳሰ፤ ኢዚካ አዎይ ደሲዛ ኢዛ ናዛ። ‘ታ ናዛ ኢሲቲ ቦሳና’ ጊ ቆፒዲ ወርሴላን ባ ናዛ ዩዲዳሰ። 7 ጎሻንቻቲ ቃሰ ባ ጊደን ‘ሃይሲ ዎና ኢዛ ላታና ናዛ፤ ሃ ዩቲ ኦ ኢዛ ዎዲኮ ቢታይ ኦሰ ጊዳና’ ጊዳ። 8 ሄሳ ጊሽ ሄን ኦይኪ ዎዲዳ ዎይኔ ሚላያ ዲዛሶፔ ሃራሶ ኬሲ ዩጊዳ።

9 “ሂሰቲን ዎይኔ ሚላ ጎዳይ አንቴሰ እይ ኦላና ሚሳቲዜ? ኢዚ ያና፤ ጎሻንቻታካ ዎዲዳ፤ ዎይኔ ሚላ ሃራታሰ ኢማና። 10-11 ጌሻ ማፃፋን

‘ሹቻ ኬሌ ኬዲዳይቲ ሃኔና ጊዲ ዎራ ዩጊዳ ሹቻይ ኬላ ማዛኔሰ ቦላ ሁዔ ጊዲዳሰ፤

ሄሳካ ጎዳይ ኦላዳሰ። ሄሲካ ኦ አይፌሰ ማላሊሲዛዝ ጌቴቲዲ ፃፌቲዳይሳ ናቤቢቤኬቲ?’ ” ጊዳሰ። **

12 ኢዚ ኢስታሰ ለሚሶዛ ዮተዳይ ኢሰታ ጊሽ ጊዲዳይሳ አይሁዳ ሃላቃቲ ኤሪዳ ጊሽ ኢዛ ኦይካናሰ ኮይዳ። ጊዳ አቲን አሳሰ ባቢዳ ጊሽ አጊ ቢዳ።

ጊራ ጊሽ ሺቁዳ ኦይሾ
(ማቶ 22:15-22፤ ሉቃ 20:20-26)

13 ዩሱሳ ዮንን ቃፃና ማላ ፋርሳዌታፔኔ ሄርዶሳ ባጋታፔ ጉላ አሳታ ደሪዲ ኢዛኮ ዩዲዳ። 14 ኢስቲካ ኢዛኮ ዩዲ “አስታማሬ!

* 12:10-11 ማዒኔ ሹቻይ፣ ቱሲ ኬሌ ናጊዳይሳ ማላ ሹቻ ኬሌ ኩንዶንታ ማላ ናጊዳይሳ። * 12:10-11 ማዛ 118:22-23

ኔን ሞሮይ ባይንዳ አስ ገዲዳይሳ ኑ ኤሮስ፤ ኔ ኦናሰካ ባባዳ ሞሮዶ ማዳካ፤ ያሳ ኦጌ ያላላ ቱሙ ታማርሳሳ። ኦሮሜ ካዎ ቁሳሬሰ ገራ ቃንፃናሰ ቤሲዜዬ? ቤሲኔ? ኑ ቃንፃኖዬ? ቃንፃፊኖ?”

15 ዩሱሲ ኢስታ ኦይሾይ ቆጴፔ ቆሞ ገዲዳይሳ ኤሪዲ “አዛሰ ታና ቃፃና ኮዬቲ? እኔ ኢሲ ዲናሬ ሃሚቲ ታ ቤያይሰ” ገዴሰ።

16 ኢስቲካ ሚሻ ኤሂን “ሃይሲ ኢዛ ቦላ ዲዛ ሚሲሌዚ ኦና ሚሲሌ? ኢዛ ቦላ ፃፊቲዳይሲ ኦና ገዜ?” ገዴሰ። ኢስቲካ “ቁሳሬይሳኮ” ገዴ። 17 ዩሱሲካ “ቁሳሬይሳ ቁሳሬሰ፣ ያሳይሳ ያሳሰ አሚቲ” ገዴሰ። ኢስቲካ ኢዛ ዛርን ማላላቲዳ።

ሃይቆፔ ዴንላ ገሽ ሸቁዳ ኦይሾ
(ማቶ 22:23-33፤ ሉቃ 20:27-40)

18 ሄሳፊ ጉዬ ሃይቁዳይታሰ ሃይቆፔ ዴንላ ባዎ ገዛ ሳዱቃዌቲ ኢዛኮ ዩዲ ኢዛ ሂዝጊ ኦይቺዳ። * 19 “አስታማሬ! ኢሲ አሲ ማቾ ኤኪዲ ና ዩሎንታ ሃይቁኮ ሃይቁዳይሳ ኢሻይ ኢዛ ማቺዮ ኤኪዲ ኢዛሰ ላታ ና ዩላና ማላ ካሴ ሙሴይ ኑሰ ፃፊዴሰ። * 20 ገዶ ኣቲን ላፑን ኢሻንቲ ዴቲሰ፤ ኢስታፊ ባይራይ ማቾ ኤኪዲ ና ዩሎንታ ሃይቁዴሰ። 21 ካሎዚ ሄ ማጫሳዮ ኤኪዲ ሃሲካ ና ዩሎንታ ሃይቁዴሰ፤ ሄሻንሳይካ ዩሎንታ ሃይቁዴሰ። 22 ላፑናቲካ ሄ ማጫሳዮ ኤኪዲ ላታ ዩሊቤቲና ዉርሴላን ማጫሳያካ ሃይቃዴሰ። 23 ሂሰቲን ላፑናቲካ ኢዛ ኤኪዳሺን ሃይቆፔ ዴንዶይ ዲዛ ገዲኮ ሃ ማጫሳያ ኢስታፊ ኦና ማቾ ገዳኔ?” ገዴ።

24 ዩሱሲካ ኢስታሰ “እንቲ ባሌቲዛይ ጌሻ ማፃፋታኔ ያሳ ዎልቃ ኤርንታ ገሻሳ። 25 ሃይቁዳይቲ ዴንዲዛ ዎዴ ሳሎ ኪታንቻታ ማላ ገዳና ኣቲን ኤኬቲቲናኔ ጌሌቲቲና። 26 ሃይቁዳይታ ዴንላ ገሻሰ ገዲኮ ሙሴ ማፃፋን ሄሲካ ቁሪ ዎራ ገደን ኤዪዛ ታማ ገዶፊ ያሲ ታኒ ኣብራሃማ ያሳ፤ ዩሳቃ ያሳ፤ ያቆሴ ያሳ፣ ገዛይሳ ናባቢቤኬቲ? * 27 ያሲ ፓፃታ ያሳ ኣቲን ሃይቁሳታ ያሲ ገዴና። ሄሳ ገሽ ኢንቲ ዳር ባሌቲዴታ” ገዴሰ።

28 ኢስቲ ፓላማን ዲሺን ፃፊታፔ ኢሳዴይ ኢስታ ፓላማ ሲይዲኔ ዩሱሲ ኦይሹቲዳይሳሰ ሎዔሳ ዛሪዳይሳ ኣኬኪዲ “ኤሮ! ኣዛዘታፔ ኡባፊ ኣጂዛይ ኣዎይሴ?” ገዲ ኦይቺዴሰ።

* 12:18 ሃዎ 23:8 * 12:19 ዛሬ 25:5 * 12:26 ኬሳ 3:6

29 ዩሱሲ ኢዛሰ ሂዘጊዳሰ “ኡባፌ አዲዛይ ሃይሳ ‘ኢሰራዔሌ ሲያ! ጎዳ ያሲ ኢሲ ጎዳ፤ 30 ኔካ ጎዳ ኔ ያሳ ኔ ኩሜላ ዋዝናፔ፤ ኔ ኩሜላ ሽምፖፌ፤ ኔ ኩሜላ ቆፋፔ፤ ኔ ኩሜላ ዋልቃፌ ደሳ።” 31 ናምዓንጸይካ ‘ኔ ላጌ ኔ ሁዔ ማላ ደሳ’ ሃ ናምዓታፔ አዲዛ አዛዘይ ባዋ።” * 32 ዓፌዚካ “አሰታማሬ፤ ሎዖ ጋደሳ፤ ‘ዖሲ ኢሲኖ ጊዲዳይሳኔ ኢዛፔ ሃራይ ባይንዳይሳ’ ኔ ዮተዳይሲ ሊኬ።” * 33 ኢዛ ኔ ኩሜላ ዋዝናፔ ኔ ኩሜላ ቆፋፔ ኔ ኩሜላ ዋልቃፌ ደሳይ ቃሴካ ኔ ላጌ ኔ ሁዔ ማላ ደሳይ ፀጌተዛ ያርሾፌኔ ሃራ ያርሾ ኡባፌ አዲሰ” ጊዳሰ። * 34 ዩሱሲካ አዳዚ ዩሺ ቆፒዲ ዛሪዳይሳ ቤዩዲ “ኔጊ ያሳ ካዋቴላፌ ሃሆን ዳካ” ጊዳሰ። ሃሳፌ ጉዬ ኢዛ ኦይቻናሰ ዓሊዳዳይ ቤተቤና። *

35 ዩሱሲ ያሳ ኬሌ ጋላን ታማርሲሼ “ሙሴ ዋጋ ታማርሲዛይቲ አዛሰ ‘ኪርሰቶሳ ዳወቲ ና’ ጊዛ? 36 ዳወቲይ ዪሎ አያናን ሃሳዩሼ ‘ጎዳይ ታ ጎዳ ኔ ሞርኬታ ታ ኔ ቶሆ ጋርሰ አላና ጋካናሰ ታ ኡሻቻን ኡታ ጊዳሰ’ ጌሰ።” * 37 ሂሰቲን ዳወቲይ ባ ዲናራ ኢዛ ‘ጎዳ’ ጊኮ ዋጊዲ ሲሚ ኢዛሰ ና ጊዳኔ?’” ጊዳሰ። ዳር ዳሬይካ ኢዚ ጊዛይሳ ኡፋይሳራ ሲዩዳሰ።

38 ኢዚ ታማርሲሼ “ሙሴ ዋጋ ታማርሲዛይታፔ ናጌቲቲ፤ ጋዳራ ጎሼተዛ አዲሳ ማይዖ ማይዒዲ ዩሽ ዩያና ደሴቴሰ፤ አዋንካ አዲ አዲ አሲ ኢሰታሰ ቦንቾ ሳርታ ኢማና ማላ ኮዩቴሰ። 39 አይሁዳታ ዋሳ ኬላን ቶቃሶ፤ ጊቢራሶካ ቦንቾሶ ኮዩቴሰ። 40 ኢሰቲ አዚናይ ባይንዳ ማጫሳ ኬላ ካሎሴቴሰ፤ ቃሴካ ባና ቤሳናሰ አዲሳ ዋሳ ዋሴቴሰ። ሃይታንቲ ኢታ ፒርዳ ፒርዳታና” ጊዳሰ።

አምዔይ ሙፀዋታ
(ሉቃ 21:1-4)

41 ዩሱሲካ አሳይ ሙፀዋታ ዩጊዛሶን ኡተዲ ዳር አሳቲ አሚዛይሳ ያሳ ኬላ ሚሻ ሺሺዛ ሳዩኔን ዩጊዛይሳ ያሊዳሰ። ዳር ዱራቲ ዳር ሚሽ ዩጊዳ። 42 ኢሲ አዚናይ ባይንዳ አምዔ ዲዛራ ኢሲ ሲኪናፌ ዳርንታ ዓርቂማላ ቢራታፔ ኦሴቴዳ ናምዑ ሚሽ ዩጋዲሰ። 43 ዩሱሲ ባና ካሊዛይታ ያይጊዲ “ታ ኢንቴሰ ቱሙ ጋይሰ፤ ሳዩኔዛን ዩጊዳ ኡባፌ ሃና ማንቆ አምዔያ አዲሳ ዩጋዲሰ። 44 ሃይቲ ዉሪ ባሰ ዲዛ ቲርፓ ሚሻፌ ዩጊዳሺን ሃና

* 12:31 ለዌ 19:18 * 12:32 ዛሬ 4:35 * 12:33 ሆሴ 6:6 * 12:34 ሉቃ 10:25-28 * 12:36 ማዛ 110:1

ቃሴ ባ ማንቆቴላፌ ባሰ ዲዛይሳ ሲንላፌ ኢዞ ኮሺዛይሳራ ዉርሳ ኢማዲሰ” ጊዴሰ።

13

ጾሳ ኬሌ ላሌታናይሳ ዬሱሲ ካሴቲዲ ዮቲዴሰ

(ማቶ 24:1-2፤ ሉቃ 21:5-6)

1 ኢዚ ጾሳ ኬላፌ ኬዚሺን ኢዛ ካሊዛይታፔ ኢሶይ “ኣሰታማሬ! ሃይሲ ኬላይኔ ኬላይ ኬፃቲዳ ሹቻይ ኣይ ማላ ሎዲዛኮኔ ሃይሳ ቤያይ?” ጊዴሰ። 2 ዬሱሲካ ዛሪዲ “ሃይታ ጊታ ኬላታ ሃላይ? ሹቻቲ ኢሶይ ኢሳ ቦላ ዲዛ ማላ ዴቴና፤ ዉሪካ ላሌታና” ጊዴሰ።

ዎዴ ዉርሴላ ማላታታ

(ማቶ 24:3-14፤ ሉቃ 21:7-19)

3 ዬሱሲ ጾሳ ኬላ ጊናራ ዲብራዛይቴ ዙማ ቦላ ኡቲዲሺን ጴፅርሰ፤ ያቆቢ፤ ዮሃኒሰኔ ኢንዲራሲ ፃላ ኢዛኮ ሸቂዲ፤ 4 “ሃይሲ ኣይዴ ሃናናኮኔ ኑሰ ዮታ። ሃይሲ ዉርሴላን ፖሌታናሰ ማላታይ ኣዜ?” ጊ ኦይቺዳ።

5 ዬሱሲካ ኢሰታሰ “ኦኒካ ኢንቴና ባሌሉንታ ማላ ናጌቲቴ። 6 ቡሮ ዳርቲ ‘ታ ኪርሰቶሳ’ ጊሹ ታ ሱንላን ያና፤ ዳርታካ ባሌላና። 7 ኢንቴ ኦላኔ ኦላ ዎሬ ሲዪዛ ዎዴ ዳጋሞፍቴ። ሄሲ ሃናናይሲ ኣቴና። ዉርሴላ ጊዲኮ ቡርና። 8 ዴሬይ ዴሬ ቦላ ካዎይ ካዎ ቦላ ዴንዳና፤ ዳርሶን ቢታ ቃሌኔ ኮሻይ ሃናና፤ ሃይቲ ዉሪ ሚፃሰ ሌሶ ማላ።

9 “ኢንቴ ኢንቴሰ ናጌቲቴ። ቡሮ ኢንቴና ዴሬ ዲላታን ኣሌ ኢማና። ኢሰቲ ኢንቴና ኣይሁዳታ ዎሳ ኬላን ጋራፋና። ኢንቴ ታ ማርካታ ጊዳና ማላ ታ ጊሽ ዴሬ ዳናታ ሲንላኒኔ ካዎታ ሲንላን ኤቃና። 10 ኮይርቲዲ ሚሺራቾ ቃላይ ዴሬ ኡባሰ ሳባኬታና ቤሴሰ። 11 ኢንቴ ኦይኬቲዲ ፒርዳሰ ሸቂዛ ዎዴ ሂና ሄ ሳቴዪን ኢንቴሰ ኢማቲዛር ሃሳዪቴ ኣቲን ቢዲ ኑ ኣይ ጊኖ? ጊዲ ካሴቲ ሂርጎፍቴ። ሃሳያናይ ፃሎ ኣያናፔ ኣቲን ኢንቴና ጊዴኬታ። *

12 “ኢሻይ ኢሻ፤ ኣዎይ ባ ና ሃይቆሰ ኣሌ ኢማና፤ ናይቲ ባና ዬሊዳይታ ቦላ ማካላናኔ ዎቆና። 13 ታ ጌዶን ኢንቴ ኣሳ ኡባን ኢፃቲዳይታ ጊዳና። ዉርሴላ ጋካናሰ ሚኒ ኤቂዳዴይ ጊዲኮ ኣታና። *

* 13:11 ማቶ 10:17-20 * 13:13 ማቶ 10:22

ዬሩሳሌም ቦላ ጋካና ጊታ ሜቶ
(ማቶ 24:15-21፤ ሉቃ 21:20-24)

14 “እንገቱ ሃራሲዛ ቱናቴሌ እዛሰ ቤሶንታሶን ኤቁዳሼ ቤይኮ ናባቢዛዴይ ዋዝናን ዋሶ፤ ዩሁዳን ዲዛይቲ ፑዴ ዙማ ቦላ ባቃቲቶ። * 15 ኬላ ካሬን ዲዛዴይ ሶ ጌሎፖ፤ ባ ሚሽ ኬሳና ጊዲ ኬሌ ጌሎፖ። 16 ጎሻሶን ዲዛዴይ ባ ማይዖ ኤካናሰ ጉዬ ሲሞፎ። * 17 ሄ ጋላሳታን ሻራ ማጫሳታሲኔ ና ቶንሌዛይታሰ አዩ-አና! 18 ሄሲካ ባልጎን ጊደንታ ማላ ያሴ ዋሲቲ። 19 ኮይሮ ያሲ ሜዴቲላ ወርሲ ሜዶሶፔ ሃዒ ጋካናሰ ዋይኮ ሃይሳፌ ጉዬ እዛ ሚሳቲዛይ ባይንዳ ጊታ ሜቶይ ሃናና። * 20 ጎዳይ ሄ ጋላሳታ ቃንሎንታኮ ኦኒካ ኣቴና ሺን ባሲ ዶሬቲዳይታ ጊሽ ሄ ጋላሳታ ቃንሌዴሰ።

21 “ሄ ዋዴ ኦኒካ ሄኮ ኪርሰቶሲ ሃይሳን ዴሰ፤ ጊኮ ዋይኮ ሄኮ ሄን ዴሰ ጊኮ ኣማኖፕቲ። 22 ዋርዶ ኪርሰቶሳቲኔ ዋርዶ ናቤቲ ቡሮ ዴንዲዲ ማላታታኔ ካሴ ሃኒ ኤርንታ ፓላ ሚሽ ኦላና። ኢሰታሰ ዳንዳዬቲኮ ሃራይ ኣቶ ሺን ዶሬቲዳይታካ ባሌላና። 23 ሃሳ ጊሽ ናጌቲቲ፤ ሄ ዋዴይ ጋኮንታ ዲሺን ሃራ ሃይሳ ወርሳ ታ ኢንቴሰ ዮታዲሰ።

ኪርሰቶሳ ናምዓንሎ ዩሰ
(ማቶ 24:29-31፤ ሉቃ 21:25-28)

24 “ሄ ዋዴ ሄ ሜቶዛፔ ካሊዲ ኣዋ ኣርሼይ ቋማና፤ ኣጊናይካ ፖዑሱኩ።
25 ያሊንቴቲ ሳሎፔ ቆቆፌታና፤ ሳሎን ዲዛ ዋልቃማቲ ቃፃና። *
26 ሄ ዋዴ ኣሳ ናይ ጊታ ዋልቃራኔ ቦንቸራ ሳሎ ሻራራ ዩሺን ኣሳይ እዛ ቤያና። * 27 ኢዚካ ኪታንቻታ ዩዲዲ ኦይዲ ባጋፌ ቢታ ጋፃፔ ጋፃ ጋካናሰ ዲዛ ባሰ ዶሬቲዳይታ ሺሻና።

ባላሴ ሚላይ ለሚሶ
(ማቶ 24:32-35፤ ሉቃ 21:29-33)

* 13:14 ዳኔ 9:27፤ 11:31፤ 12:11 * 13:16 ሉቃ 17:31 * 13:19 ዳኔ 12:1፤ ኣጂ. 7:14 * 13:25 ኢሳ 34:4፤ ኣጂ. 6:13፤ ኢዩ 2:10 * 13:26 ዳኔ 7:13፤ ኣጂ. 1:7

28 “ለሚሶዛ ባላሴ ሚላፌ ታማሪቴ። ኦንቁሎይ ጨለሊዛ ዋይ ሃይሉ ከሲሸን ቦኔይ ማተዳይሳ አንቴ ኤሬታ። * 29 ሄሳባካ ሃይቲ ታ ገዳይቲ ፖሌቲሸን አንቴ ቤይኮ ዋይይ ማቲ ዩዲ ፔንጌ ጋኪዳይሳ ኤሬቴ። 30 ታ አንቴሰ ቱሙ ጋይሰ፤ ሃ ዮፆቲ ፖሌታና ጋካናሰ ሃይሲ ሃ ዩሌታይ አዴና። 31 ሳሎይኔ ሳዓይ አጻና ሸን ታ ቃላይ ገዲኮ አዴና።

ጎዳይ ያና ጋላሳዮኔ ሳቴዮ ኦኒካ ኤሬና
(ማቶ 24:36-44)

32 “ቃሴ ሄ ጋላሳይ ገሽ ዋይኮ ሄ ሳቴይ ገሽ ታ አዋፔ ኦቲን ሳሎ ከታንቻታ ገዲንካ ናዛ ገዲንካ ኦኒካ ኤሬና። 33 ሄሳ ገሽ ዋይይ አይዳኮኔ አንቴ ኤርንታ ገሽ ናጌቲቴ፣ ሚኒቴኔ ዋሲቴ። 34 ሄሲካ ባ ከሌ አሸካራታሰ አገዲ አሸካራታ አሳ አሳ ኦሶ ኦይሌዲ ፔንጌ ናገዛይሲ ቤገዲ ናጋና ማላ አዛዚዲ ቢዳ አሳ ሚሳቴሰ። *

35 “ሂሰቲኮ ከላ አዋይ አይዳ ያናኮኔ ዋይኮ ቃማ ሌላ ገደላ ያናኮኔ ዋይኮ ኮይሮ ኩቶይ ባቁሸን ያናኮኔ ዋይኮ ዋንታ ቦላ ባዘይ ዞሲሸን ያናኮ አንቴ ኤርንታ ገሽ ቤገዲ ናጌቴ። 36 አንቴ ቆፖንታ ዲሸን አዚ ዩዲ አንቴ ዲሰኪዲሸን አንቴና ዳዋፎ።

37 “ታ አንቴሰ ዮቲዛይሳ አሳ ኡባሰ ዮታይሰ፤ ሚኒዲ ናጌቴ! ጋይሰ” ገዴሰ።

14

አሳይ ዩሱሳ ዋጻናሰ ማቁቲዳሰ
(ማቶ 26:1-5፤ ሉቃ 22:1-2፤ ዮሃ 11:45-53)

1 ፓዚጋኔ ኡኬላ ሙሳ ባዓሌ ጋላሳይ ቦንቹታናሰ ናምዑ ጋላሲ ኦቲሸን ቁሴታ ሃላቃቲኔ ሙሴ ዋጋ ታማርሲዛይቲ ዩሱሳ ባሌሌ ኦይኪዲ ዋጻና ኦጌ ኮይዳ። * 2 ገደ ኦቲን “አሳይ ሜቶ ሜጶንታ ማላ ባዓሌ ጋላሳታን ገደፖ” ገደ።

3 አዚ ቢታኒያ ጌቴቲዛ ሶን አሲ አንቹራቻ ሃርጋንቻ ገዲዳ ሲሞና ሶን ቁማ ቦላ ዲሸን ዋጋይ ዳሮ አልፎ ገዲዳ ናርዶሴ ጌቴቲዛ ሸቶይ ኩሚ ኡቲዳ አልባሰዒርሴ ቢልቃፆ ኦይኪዳ አሲ

* 13:28 ሃይሲ ሃ ቆፋይ ቤሲዛይሲ አሰታ ዳሬን ዲዛ ሚላቲ አጨዛይኔ ሃይላቲ ጨለሊዛይ ቦኔ ገዲዳይሳ ቤሳናሳ። * 13:34 ሉቃ 12:36-38 * 14:1 ኬሳ 12:1-27

ማጫሳያ ቢልቃጫ ማንጻዳ ሺቶዛ ዩሱፊ ሁዔ ቦላ ጉሳዲስ።
*

4 ሄን ጋዳን ዲዛ አሳታፔ ኢሲ ኢሲ አሳቲ “ሃይሲ ሺቶዚ አዛሰ ዎጋይ ባይንዳ ጉኪዜ?” ጊዲ ባ ጊደን ሃንቄቲዳ። 5 “ሺቶዚ ባይዘ ባይዚዳኮ ሄቩ ጻቱ ዲናሬፔ ቦላራ ባይዜቲዲ ማንቆታሰ አሜቴኔሺን” ጊዲ ማጫሳዮካ ካጲዳ። *

6 ጊደ አቲን ዩሱሲ ኢሰታሰ “አገቴ! ሃሮ ማጫሳዮ አዛሰ ዋይሴቲ? ኢዛ ታሰ ሎዎ ሚሽ ኦላዲስ። 7 ማንቆቲ አይ ዎዴካ አንቴናራ ዴቲስ። አንቴ ኮይዳ ዎዴ አይዴካ ኢሰታ ማዳናሰ ዳንዳዬታ ሺን ታ ጊዲኮ ኡባ ዎዴ አንቴናራ ዲኬ። * 8 ሃና ባ አላናሰ ዳንዳዩዛሪ ኬና ኦላዲስ። ታሰ ዋሳሰ ጊዳና ማላ ታ አሾ ካሴታ ቲያዲስ። 9 ታ አንቴሰ ቱሙ ጋይሰ፤ ሃይሲ ሚሺራቾ ቃላይ አላሜ ኩሜላን ሳባኬቲዛሶን አዋንካ ኢዛ ኦሌዳይሲ ኢዛ ሃሳዒሲዛዝ ጊዲዲ ሃሳዬታና” ጊዴስ።

የሁዳይ ዩሱፊ አላ አማናሰ ገጊዴሰ
(ማቶ 26:14-16፤ ሉቃ 22:3-6)

10 ሄሳፌ ጉዬ ታማኔ ናምዓታፔ ኢሶይ አሰቆርንቶ የሁዳይ ዩሱፊ አላ አማናሰ ቄሴታ ሃላቃታኮ ቢዴስ። 11 ኢሰቲካ ሄሳ ሲይዲ ኡፋዬቲዳ፤ ኢዛሰ ሚሼ አማናሰ ኢዛራ ገጊዲ። ሄሳ ገሽ ዩሱፊ አላ አማናሰ አንጄ ዎዴ ናገሼ ጋምዒዴስ።

12 ፓዚጋ ዶርሲ ሹኬቲዛ ኡኬላ ሙሳ ቦንቺዛ ኮይሮ ጋላሰ ዩሱፊ ካሊዛይቲ ዩሱሳኮ ሺቄዲ “ፓዚጋ ካዎ ማናሶ አዋን ገገሳና ማላ ኮያይ?” ጊ ኦይቺዳ።

13 ኢዚካ ባና ካሊዛይታፔ ናምዓታ “ጌዴ ካታማ ቢቲ፤ አንቴ ቢሺን ሃሌ ኦቶራ ቶኪዳ አሳዴይ አንቴናራ ጋጋና። 14 ኢዚ ቢዲ ፔሊዛሶ ጋካናሰ ኢዛ ካሊቲ። ኬላዴዛሰ ‘አሰታማሬይ ኔና ታና ካሊዛይታራ ፓዚጋ ካዎ ማናሰ ታሰ ጊዲዛ አማላ ሸምፖሶይ አዋይሴ? ጊዴስ’ ገቴ። 15 ኢዚካ ቦላ ፖቄ ቦላ ዲዛ ገጊ ኡቲዳ አሆ ሶ አንቴና ቤሳና፤ ሄን ኢዛን ገገሲቲ” ጊ ኪቲዴስ።

16 ኢዛ ካሊዛይቲካ ኬዚዲ ጌዴ ካታማ ቢዳ። ወሪካ ዩሱሲ ጊዳ ማላ ሃኒ ቤቲዴስ፤ ፓዚጋካ ሄን ገገሲዲ።

17 ጋዴይ ቃሚሺን ዩሱሲ ባና ካሊዛ ታማኔ ናምዓታራ ጋኪዴስ። 18 ኢሰቲ ማዳን ዲሺን “ታ አንቴሰ ቱሙ ጋይሰ፤

* 14:3 ሉቃ 7:37-38 * 14:5 300 ዲናሬይ ጉሲ ቤኒ ዎዴ አሳሰ ላይላ ዳዋዛ። * 14:7 ዛሬ 15:11

አንቲ ጊደፌ አሶይ አዚካ ታናራ አሲፌ ሚዛይሲ ታና አሌ አማና” ጊደሰ። *

19 አሰቲካ ሙዙቲዲ “ታኔሻ? ታኔሻ?” ጊዲ አሶይ አሶይ ዩሱሳ ኦይቸዳ።

20 አዚካ አሰታሰ “ታማኔ ናምዓታፔ አሶይ ታናራ ባ ኩሼ ኬሬን ዩዲዛዳ። 21 ካሴ ፃፌቲዳ ማላ አሳ ናይ አዛ ጊሽ ሃይቃና ሽን አሳ ና አሌ አሚዛዳሰ አዩ-አና! ሄሳዳይ ካሴ ዩሌቶንታ ኣጊዳኮ አዛሰ ሎዖኮሺን!” ጊደሰ።

ጎዳ ካዎ ኤኮ ዎጋ

(ማቶ 26:26-30፤ ሉቃ 22:14-23፤ 1ቆር 11:23-25)

22 አሰቲ ሚሽን ኡኬላ ኤኪ አንጂዲኔ ሜንሊዲ ባና ካሊዛይታሰ “ሃይሳ ታ አሾ ሄይቲ” ጊ አሚዳሰ።

23 አሻካ ዳንሊ ጋላቲዲ አሰታሰ አሚን አሰቲ ወሪካ ኡዩዳ።

24 ቃሴ ዩሱሲ “ሃይሲ ዳርታ ጊሽ ጉካና ታ ኦራላ ጫቆ ሱላ።

* 25 ታ አንቲሰ ቱሙ ጋይሰ፤ ኦራላ ዎይነፔ ጊጊዳ ኡሻ ዖሳ ካዎቲላን ታ ኡያና ዎዴ ጋካናሰ ናምዓንሉ ሃይሳ ኡዩኬ” ጊደሰ።

26 ሄሳፌ ጉዩ ማዛሙራ አሲፌ ዩዲዲ ፑዳ ዳብራዛይቲ ዙማ ቦላ ኬዚዳ።

27 ዩሱሲ “ ታ ሄሚዛይሳ ሾጫና ሄ ዎዴ አዛ ደርሳቲ ላሌታና’ ጌቲቲ ፃፌቲዳይሳ ማላ አንቲ ወሪካ ታናን ዲጴታና።

* 28 ታ ዳንዲዳይሳፌ ጉዩ ጊዲኮ ታ አንቲፌ ካሴታዳ ጋለላ ባና” ጊደሰ። *

29 ጴጥሮሲካ “አሳይ ወሪ ቆጴቲኮካ ታኒ ቆጴቲኬ!” ጊደሰ።

30 ዩሱሲካ “ታ ኔሰ ቱሙ ጋይሰ፤ ሃቺ ቃማ ኩቶይ ናምዑቶ ዋሳና ጋካናሰ ኔኒ ታና ሄሹቶ ካዳና” ጊደሰ።

31 ጴጥሮሲ ቃሰ “ታ ኔናራ ሃይቁዛኮካ ሙሉካ ኔና ካዳኬ” ጊዲ ኬሂ ሚንሊ ዮቲዳሰ። ሃንኮይቲካ ወሪ አዛይሳሉ ጊዳ።

ዩሱሲ ጌቲሴማኔን ዎሲዳሰ

(ማቶ 26:36-46፤ ሉቃ 22:39-46)

32 ሄሳፌ ጉዩ ጌቲሴማኔ ጌቲቲዛሶ ቢዳ ዩሱሲካ ባና ካሊዛይታ “ታኒ ዎሲሺን አንቲ ሃይሳን ጋምዲሺቲ” ጊደሰ።

33 ጴጥሮሳ፣ ያቆቤኔ ዮሃንሳ ባናራ ኤኪ ቢዳሰ። ኬሂ ቆፒዳሲኔ

* 14:18 ማዛ 41:9 * 14:24 ኬሳ 24:8፤ ኤር 31:31-34 * 14:27
ዛካ 13:7 * 14:28 ማቶ 28:16

ሜቶቲዳስ። 34 ቃሴካ ኢስታስ “ታ ሸምፖፖ ዳር ሜቶታዲስ ኢንቴ ሃን ዲሺቴ። ጳስኮንታ ናጊቴ” ጊዳስ።

35 ኢስታ አቻፌ ጉል ጌዴ ፖቂዲ ቢታ ቦላ ጉፋኒዲ ሃንኮ ሄ ሳቴያ ኢዛፔ አቆና ማላ ዋሲዳስ። 36 “ታ አዋዉ! ኔስ ዉሪ ዳንዳዬቴስ፤ ሃይሳ ዋዬ ፀዓ ታፔ ሃሳ። ጊዲኮካ ኔ ሸኔፔ አቴን ታ ሸኔይ ሃኖፖ” ጊዳስ።

37 ኢዚ ሄፔ ሲሚ ዩሺን ኢዛ ካሊዛይቲ ጳሲኪዳይታ ቤዩዳስ። ጳፀርሳካ “ሲሞና ጳሲካዲ? ሃራይ አቶ ሸን ኢሲ ሳቴካ ሚናዳ ናጎይ ኔና ያኒዴ? 38 ኢንቴ ፓጩን ጌሎንታ ማላ ቤጊዲ ዋሲቴኔ ሚኒቴ። አያናይ ጊጌቲ ኡቴዳስ ሸን አሾይ ጊዲኮ ዳቡራንቻ” ጊዳስ።

39 ቃሴካ ቢዲ ኮይርይሳዎ ዋሲዳስ። 40 ኢዚ ናምዓንዎ ሲሚ ዩሺን ኢስታ አይፌን ጳሲኮይ ዳዒን ጳሲኪዳይታ ዳሚዳስ ሸን ኢስቲ ኢዛስ አይ ዛራናኮኔ ኤሪቤቴና።

41 ሄቫንዎ ዩዲ “ሃዒካ ኢንቴ አቺዲ ሸምፔቲ? ሃዒ ጊዳና፣ ሳቴያካ ጋካዱስ፤ ሄኮ አሳ ናይ ናጋራንቻታ ኩሸን አጲ አሜታና። 42 አኔ ኤቁቴ ቦስ፤ ታና አሉ አማናዴይ ዩዳስ” ጊዳስ።

ዩሱሲ ኦይኬቴዳሲኔ አጲ አሜቴዳስ
(ማቶ 26:47-56፤ ሉቃ 22:47-53፤ ዮሃ 18:3-12)

43 ዩሱሲ ቡር ሃሳያን ዲሺን ታማኔ ናምዓታፔ ኢሶይ ዩሁዳይ ዩዳስ። ኢዛራ ኢሲፌ ቄሴ ሃላቃታፔኔ ሙሴ ዋጋ ታማርሲዛይታፔ ኪቴቲዳ ዳር አሳይ ገላ ማሻኔ ዱርቃ ኦይኪዲ ዩዳስ። 44 ኢዛ አሉ አማና ዩሁዳይ ኢስታስ “አሳ ጊዳፌ ታ ዩሪዛዴይ ኢዛ ጊዲዳ ጊሻስ ኦይኪዲ ሎዔሉ ናጊ ኤፊቴ” ጊዲ ካሴቴ ማላታ አሚ ዋሉዳስ።

45 ጋኪዳ ማላ ዩሁዳይ ዩሱሳኮ ሸቂዲ “አስታማሬ!” ጊዲ ዩሪዳስ። 46 አሳቲካ ዩሱሳ ኦይኪዳ። 47 ኢዛ አቻን ኤቂዳ ኢሶይ ማሻ ኮሆፔ ሾዲ ቄሴታ ሃላቃ አሸካራ ሃይል ቃንዒዳስ። 48 ዩሱሲካ ኢስታስ “ፓንጋ ማላ ታና ኦይካና ማሻኔ ዱርቃ ኦይኪዲ ዩቲ? 49 ዋንቲን ዋንቲን ያሳ ኬላን ታማርሳሼ ታ ኢንቴናራ ዲሺን ኦይኪቤኬታ ሸን ካሴ ዓፌቲዳይሲ ፖሌታና ማላ ሃይሲ ሃኒዳስ” ጊዳስ። *

* 14:49 ሉቃ 19:47፤ 21:37

50 ሄሳ ዋዴ ኢዛ ካሊዛይቲ ወሪ ኢዛ ዩጊ ኣጊ ቢዳ። 51 ባ ካሎቴሉ ቁሪ ናፃላን ካሚዳ ኢሲ ናይ ዩሱሳ ካሊሺን ኣሳይ ኢዛ ኦይኪን። 52 ናዚ ናፃላ ዩጊዲ ካሎ ኪቺዳስ።

ዩሱሳ ፐርዳ ዲላታኮ ሺሺዳ

(ማቶ 26:57-68፤ ሉቃ 22:54-55፤63-71፤ ዮሃ 18:13-14፤19-24)

53 ዩሱሳካ ጌዴ ቁሴታ ሃላቃኮ ኤፊዳ። ቁሴታ ሃላቃቲ፤ ዴሬ ጨማቲኔ ሙሴ ዋጋ ታማርሲዛይቲ ሄን ኢሲፊ ወሪ ሸቂዳ። 54 ጳፅርሲካ ዩሱሳ ሃሆራ ካሊሹ ቁሴታ ሃላቃ ጊቤ ጋካናሰ ቢዳስ። ኢዚ ሄን ኡቲዲ ሃራ ኣሳታራ ታማ ሆዒሺን። 55 ቁሴታ ሃላቃቲኔ ዴሬ ጨማቲ ወሪ ዩሱሳ ዋቆናሰ ማርካታና ኣሰ ኮይዳ ሺን ዴማናሰ ዲንዳዪቤቲና። 56 ዳሮቲ ኢዛ ቦላ ዋርዶራ ማርካቲኮካ ማርካታ ቃላይ ኦይኬቲቤና።

57 ኢሲ ኢሲ ማርካቲ ዴንዲዲ ዋርዶራ። 58 “ሃይሲ ኣዴዚ ታ ኣሳ ኩሺን ኬፃቲዳ ያሳ ኬላ ላላዳ ኣሳ ኩሺይ ቦቸንታዝ ሃራ ያሳ ኬላ ሄሹ ጋላሳራ ታ ኬፃና ጊሺን ኮ ሲዪዶስ” ጊ ማርካቲዳ። * 59 ጊዶ ኣቲን ኢሰታ ማርካቲሉ ኢሲ ቦላ ዋቂቤና።

60 ቁሴታ ሃላቃይካ ኢሰታ ሲንላን ኤቂዲ “ሃይቲ ኔ ቦላ ማርካቲዛይሲ ኣዜ? ኔ ኣዛሰ ዲና ዛሪኪ?” ጊዲ ዩሱሳ ኦይቺዳስ።

61 ጊዶ ኣቲን ዩሱሲ ኢሰታስ ኣይኮካ ዛርንታ ጮው ጊዳስ። ቁሴታ ሃላቃይ ቃሴካ “ኣንጃቲዳ ያሳ ናይ ኪርሰቶሲ ኔኔ?” ጊ ኦይቺዳስ።

62 ዩሱሲካ ዛሪዲ “ኤ፤ ታናኮ! ኣሳ ናይ ዋልቃማ ያሳ ኡሻቻን ኡቲሺኒኔ ሳሎ ሻራራ ዩሺን ኢንቴ ኢዛ ቤያና” ጊዳስ። *

63 ቁሴታ ሃላቃይ ባ ማይያ ዳኪዲ “ኡሰ ሃራ ኣዛ ማርካ ኮሺዜ? 64 ኢዚ ጫሻ ቃላ ያሳ ቦላ ሃሳይሺን ኢንቴ ሲዪዳታ፤ ሃዒቶ ኢንቴሰ ኣይ ሚሳቲዜ?” ጊዳስ። ኢሰቲካ “ኢዛሰ ሃይቆይ ቤሰሰ” ጊዲ ወሪካ ኢሲ ቃላን ፐርዲዳ። *

65 ሄሳ ዋዴ ኢሲ ኢሲ ኣሳቲ ኢዛ ቦላ ጨቶ ጨቲዳ፤ ኢዛ ኣይፊ ጎዚ ኦይኪዲ ኢጨሹ “ኣኔ ቲንቢቲ ዮታ” ጊዳ። ባጋይቲ ቃሴ ሻጋላን ባቂሹ ኤፊዳ።

* 14:58 ዮሃ 2:19 * 14:62 ዳኔ 7:13 * 14:64 ሉቁ 24:16

ጴጥሮስ ዩሱፍ ካዲዳስ

(ማቶ 26:69-75፤ ሉቃ 22:56-62፤ ዮሃ 18:15-18፤25-

27)

66 ጴጥሮስ ዲጌ ባጋራ ሄን ጊቤ ጊዶን ዲሺን ቄሴታ ሃላቃ ጋራዳታፔ ኢሲኒያ ያደሱ። 67 ጴጥሮስ ታማ ሆዲሺን ቲሺ ሂሰታ ጭላዳ “ኔኒ ናዚሬቴ ዩሱፍ ዳሳ ጊዲኪ?” ጋደሱ።

68 ኢዚ ቃስ “ኔ ጊዛይሳዳ ታ ኤሪኬ፤ ኔ ጊዘይሲ ታስ ጌሌና” ጊዲ ካዲዳስ። ሄሳፌ ጌዳ ፔንጌ ፖቂ ኤቂ ዲሺን ሄራካ ኩቶይ ዋሲዳስ።

69 ሄ ጋራዳያ ኢዛ ቤዩዳ ማላ ሄን ኤቂዳ አሳታስ “ሃይሲ አዳዚ ኢዛራ ዲዛ አሳታፔ አሳዳኮ!” ጋዳ ቃሴካ ሃሳያደሱ።

70 ኢዚ ቃሴካ ካዲዳስ። ጌላ ዋዳ ጋምዲሺን ሄን ኤቂዳ አሳቲ ጴጥሮስ “ኔኒ ጋለላ አሳ፣ ሄሳ ጊሽ ቱማፔ ኔ ኢሰታፌ አሳዳ” ጊዳ።

71 ጊዶ አቲን ኢዚ ቃስ “ኢንቴ ጊዛዳ ታ ኤሪኬ!” ጊሼ ጫቆኔ ባና ቃንጌላ ኦይኪዳስ።

72 ሄራካ ኩቶይ ናምዳንሉ ዋሲዳስ። ጴጥሮስካ “ኩቶይ ናምዳ ዋሳናስ ኔ ታና ሄቫ ካዳና” ጊዳ ዩሱፍ ቃላይ ኢዛስ ቆፊቲን ሂቂሚዲ ዩኪዳስ።

15

ዩሱፍ ጲላዎሳኮ ኤፊዳ

(ማቶ 27:1-2፤11-14፤ ሉቃ 23:1-5፤ ዮሃ 18:28-38)

1 ማላዶ ዋንታራ ቄሴታ ሃላቃቲ፣ ዳሬ ጨማቲኔ ሙሴ ዋጋ ታማርሲዛይቲ ኩሜላ ሻንጎ አላፌታራ ኢሲፌ ዘሬቲዲ ዩሱፍ ቃቺ ኤኪ ኤፊዲ ጲላዎሳስ አሉ ኢሚዳ።

2 ጲላዎሳካ ዩሱፍ “ኔ አይሁዳታ ካዎ?” ጊ ኦይቺዳስ። ዩሱሲካ “ኤ፣ ኔ ጊዳ ማላ” ጊዲ ኢዛስ ዛሪዳስ።

3 ቄሴታ ሃላቃቲካ ዳር ዮዖ ኢዛ ቦላ ሺሺ ሞቲዳ። 4 ጲላዎሳ ቃስ “ኔ አዛስ ኦይሻ ዛሪኪ? ሄኮ ኔና ዳር ዮዖን ሞቲቲስ” ጊዲ ቃሴካ ኦይቺዳስ።

5 ጊዶ አቲን ዩሱሲ ሃዒካ ኢዛስ አይኮካ ዛር አምንታ ጊሽ ጲላዎሳካ ማላሌቲዳስ።

6 ፓዚጋ ባባሌ ጋላስ ጲላዎሳ ዳሬይ ቢርሻና ማላ ኦይቺዳዳ ቢርሺ ዩዲዛ ዋጋይ ካሴ ዳስ። 7 ኢታ ኦሶን ዳሬ ቦላ ዳንዲዲ ሽምፖ ዋዲዳ አሳታራ ኢሲፌ ቃሼቲዳ ባርባኔ ጌቲቲዛ አሳዳይ

ደስ። 8 ዳሬይካ ዩዲ ካሴ ሎሴ ጊዲዳይሳ ኢዚ ኦፋና ማላ ጲላጾሳ ዋሲደስ።

9 ጲላጾሲካ ኢስታስ “ታ ኢንቴስ ኣይሁዳ ካዎ ቢርሻና ማላ ኮይተ?” ጊ ኦይቹደስ። 10 ጲላጾሲ ሄሳፉ ኦይቹዳይ ካሴ ቄሴታ ሃላቃቲ ዩሱሳ ቃናቲን ኣሉ ኢሚዳይሳ ኤሪዛ ጊሻሳ።

11 ቄሴታ ሃላቃቲ ቃስ “ኢዛ ኤፃ ባርባኔይ ቢርሼቶ!” ጊ ኦይቻና ማላ ዳሬዛ ዳንጮዲ። 12 ጲላጾሲ “ሂስቲኮ ኢንቴ ኣይሁዳ ካዎ ጊዛ ኣዳዛ ዋስታና ማላ ኮይተ” ጊደስ።

13 ኢስቲ ቃሴካ “ካቃ! ካቃ!” ጊ ዋሲዳ።

14 ጲላጾሲካ “ኣይ ኢታ ኦሉዳ?” ጊ ኢስታ ኦይቹደስ። ኢስቲ ቃስ “ካቃ! ካቃ!” ጊዲ ካሴፕ ኣሉ ዋሲዳ።

15 ጲላጾሲካ ዳሬዛ ኡፋይሳና ጊዲ ባርባኔ ኢስታስ ቢርሼደስ። ዩሱሳ ጋራፊዲ ካቃናስ ኣሉ ኢሚደስ።

ዎታዳራቲ ዩሱሳ ቦላ ቁሊጪዳ

(ማቶ 27:27-30፤ ዮሃ 19:2-3)

16 ዎታዳራቲ ዩሱሳ ዳሬ ሃሪዛይሳ ጊቤ ኤኪ ቢዲ ኣቲዳ ዎታዳራታ ወርሲ ሺሺዳ። 17 ዩሱሳ ዘፃ ማይፃ ማይዚዳ፤ ኣጉንፋ ኣክሊሌ ፃዲ ኢዛ ሁዒን ዋሉዳ። 18 ሃሳፊካ “ኣይሁዳ ካዎ ሳርይ ኔስ ጊደ!” ጊሼ ኢዛ ሳርሉዳ። 19 ኢዛ ሁዒ ጉፊራ ሾጪዳ፤ ኢዛ ቦላካ ጩቲዳ ጉልባቲዲ ኢዛስ ጎይኒዳ። 20 ኢዛ ቦላ ቁጵ ካዒዳፕ ጉዩ ካሴ ማይዚዳ ዘፃ ማይፃዛ ቃሪ ኤኪዲ ካሴ ኢዛ ማይፃዛ ዛሪ ማይዚዲ ካቃናስ ኤኪ ቢዳ።

ዩሱሳ ካቄቲል

(ማቶ 27:31-44፤ ሉቃ 23:27-43፤ ዮሃ 19:17-27)

21 ኣላኪሳንድሮሳኔ ሩፎሳ ኣዎ ሰሞና ጌቲቲዛ ኢሲ ቃሪና ዳሬ ኣሲ ዳሬፕ ካታማ ዩዛይሳ ዩሱሳ ማስቃሌ ዋልቃራ ኦይኪ ቶሲዳ። * 22 ሃሳፊ ጉዩ ዩሱሳ ጎልጎታ ጌቲቲዛሶ ኤፊዳ፤ ኢዛስ ቢርሼላይ “ኣሳ ሁዒ ጉጌ” ጉሳ። 23 ካርቤ ጌቲቲዛ ጫሞራ ዋላኬቲዳ ዎይኔ ጫጃ ኡያና ማላ ኢዛስ ኢሚን ኢዚ ኤኮንታ ኢዲደስ። 24 ሃሳፊ ጉዩ ኢዛ ካቄዳ፤ ኢዛ ማይፃ ኢሳዴ ኢሳዴ ኣዋይሲ ጋካናኮኔ ጊዲ ሳማ ዩጊዲ ጊሼቲዳ።

25 ኢስቲ ኢዛ ካቄሺን ዎንታፊ ሄቩ ሳቲ ጊዲደስ። 26 ኢስቲ ማስቃሌ ቦላ ፃፊ ሺሺዳ ሞቶ ቃላይ “ኣይሁዳ ካዎ” ጊዛ ቃላ። 27 ኢዛራ ኢሲፊ ናሞዑ ፓንጋታ ኢሳ ኢዛፕ ኡሻቻራ ኢሳ

* 15:21 ኦር 16:13

ሃዲርሳራ ካቂዳ። 28 ሄሳንካ ካሴ ማፃፋይ “ኢታታራ ኢሲፊ ታይቤተደስ” ገዳ ተንቢቲ ቃላይ ፖሌቲደስ። **

29 ኦጌራ አጼ በዛይቲካ ባ ሁዔ ቃሊሽ “ኦይ! ኦይ! ያሳ ኬላ ላላዳ ሄቹ ጋላሳን ከፃናይ ኔኔ?” ገዲ ኢታ ጫሽ ጫዩሽ፤

* 30 “እኔ ሃዲ ማሰቃሌ ቦላፊ ዋቆዳ ኔና አሻ” ገዳ።

31 ሄሳሉካ ቄሴታ ሃላቃቲኔ ሙሴ ዋጋ ታማርሲዛይቲ ባ ገደን ኢሶይ ኢሳስ “ሃራታ አሽደስ ሽን ባና አሻና ዳንዳይቤና” ገዲ ኢዛ ቁጵዳ። 32 “ኑ ኢዛ ቤዪዲ አማናና ማላ እኔ ሃይሲ ከርሰቶሲ ኢሰራዔሌታ ካዎይ ሃዲ ማሰቃሌፕ ዋቆ” ገዳ። ኢዛራ ካቂቲዳይቲካ ኢዛ ቦላ ጫሽ ኮሪዳ።

ዩሱሳ ሃይቆ

(ማቶ 27:45-56፤ ሉቃ 23:44-49፤ ዮሃ 19:28-30)

33 ኡሱፑን ሳቴፔ ኦይኪዲ ኡዲፋን ሳቴ ጋካናስ ቢታይ ወሪ ቆሚደስ። 34 ኡዲፋን ሳቴ ቦላ ዩሱሲ “ኤሎሄ! ኤሎሄ! ላማ ሳባቂታኔ” ገዲ ቃላ ቶቁ ሂስቲዲ ዋሲደስ። ሄሳስ ቢርሽላይ “ታ ያሶ! ታ ያሶ! ኔ ታና አዛስ አጋዲ?” ጉሳ። *

35 ሄን ጋደን ኤቁዳ አሳፔ ኢሲ ኢሲ አሳቲ ሄሳ ሲይዲ “ኤላሳ ያይገስኮ” ገዳ። 36 ሄሳፊ ኢሲ አሲ ኤሌሊ ቢዲ ጫሊዳ ዋይኔ ጫጃ ኢስፖንጃ ማላ ሚሻን ጌልሊ ከሲዲ ሚላ ያራን ኦይሊዲ ኡያና ማላ ዩሱሳስ ሽሽደስ። ሄሳፊ ቃሴ “እኔ አጋጊቲ፤ ኤላሲ ዩዲ ኢዛ ካቆፔ ዋሊሽን ኑ ቤያና” ገደስ። †

37 ሄሳፊ ዩሱሲ ቃላ ቶቁ ሂስቲ ዋሲዲ ሽምፖ ከዚደስ።

38 ያሳ ከሌ ማጋላሻይ ሁዔራ ዲጌ ናምዑ ከዚ ዳኬቲደስ።

* 39 ዩሱሳ ገናራ ኤቁዳ ኢሲ ማቶ ሃላቃይ ዩሱሲ ሄሳሉ ገታ ቃላራ ዋሲዲ ሽምፖ ከዚሽን ቤዪዲ “ሃይሳዳይ ቱሙ ያሳ ናኮሽን” ገደስ። 40 ሄሳ ዋዴ ማጫሳቲ ሃኒዛይሳ ሃሆን ዲዲ ያሊዳ። ኢስታ ገደፊ ማግዳሌፕ ዩዳ ማራማኔ ካሎቲዛ ያቆቤኔ ዮሳ አዮ ማራሚራ ቃሴካ ሳሎሚራ ኢሲፊ ዳቴስ። 41 ሄይቲ ማጫሳቲ ጋሊላን ዩሱሳ ካሊሽኔ ኢዛስ ኦሊሽ ጋምዒዳይታ። ኢስታራካ ኢሲፊ ሃራ ዳር ማጫሳቲ ዩሩሳላሜ ቢዳ። *

* 15:28 ኢሲ ኢሲ ገሻ ማፃፋቲ ፓይዶ 28 ቦላ ዲዛ ቆፋ ጉጃቴስ፤ ቃላይካ ሉቃሳን 22:37 ቦላ ዲዛይሳ ሚሳቴስ። * 15:28 ኢሳ 53:12 * 15:29

ማዛ 22:7፤ 109:25፤ ማር 14:58፤ ዮሃ 2:19 * 15:34 ማዛ 22:1 † 15:36 ጫሊዳ ዋይኔ ጫጃ ካቂቲዳ እሲ ባ ዋዬ ባላና ማላ ኡሽቴስ። * 15:38 ከሳ

26:31-33 * 15:41 ሉቃ 8:2-3

42 ጋደይ ቃሚ ቃሚ ቢሺን ሳምባታሰ ገጌተዛ ጋላሲ ጋዜዳስ።
 43 ዳሬ ጨማታ ገደን ቦንቹቲዳ ኢሲ ኦርማቲያሳ ዳሬ ኣሰ ዮሴፌ ጌቴተዛይሲ ያሳ ካዎቴሉ ናገሼ ዲዛዳይ ባቦንታ ጰላጾሳኮ ቢዲ ዩሱሳ ኣሃ ዎሲዳስ። 44 ጰላጾሲካ ኢዚ ሂኒ ዎዴ ኤሌራ ሃይቁዳይሳ ሲይዲ ማላሌቲዳስ። ማቶ ሃላቃ ዪይገሰዲ “ኢዚ ሃይቁ ጋምዒዳ?” ገዲ ኦይቹዳስ። 45 ኢዚ ሃይቁዳይሳ ማቶ ሃላቃይ ጌሺ ኤሪዳፔ ጉዬ ዩሱሳ ኣሃ ዮሴፌስ ኢሚዳስ። 46 ዮሴፌካ ሞጎ ማይያ ሻሚዲ ኣሃ ማሰቃሌፔ ዎሊዲ ሞጎ ማይያን ፃዲ ሹቻፌ ዎጩቲዳ ዳሬን ሞጊዳስ። ዳፋ ዳና ሹቻራ ጎርዲዳስ። 47 ማግዳሌፔ ዩዳ ማራሚራኔ ዮሴፌ ኣዮ ማራሚራ ዩሱሳ ኣሃ ኣዎን ሞጊዳኮኔ ቤዩዳ።

16

ዩሱሲ ሃይቆፔ ዳንዲዳስ
 (ማቶ 28:1-8፤ ሉቃ 24:1-12፤ ዮሃ 20:1-10)

1 ሳምባታይ ኣዲጃፔ ጉዬ ማግዳሌ ማራማ፡ ያቆቤ ኣዮ ማራሚራኔ ሳሎሚራ ኢሲፌ ቢዲ ዩሱሳ ኣሃ ቲያናሰ ሺቶ ሻሚዳ። 2 ሳሚንታፌ ኮይሮ ጋላሰ ማላዶ ዎንታራ ቡሮ ኣዎ ኦርሼይ ኬዚዳ ማላ ዩሱሳ ዳሬኮ ቡሮ ቢሺን፤ 3 “ዱፎዛ ዳናፔ ሹቻ ኮሰ ኦኒ ገንዳርሳኔ?” ገዲ ባ ገደን ሃሳዩቲዳ።
 4 ኢሰቲ ጶቁ ገ ዪሊሺን ዳሮ ገታ ሹቻይ ዳሬዛ ዳናፔ ገንዳራይሳ ቤዩዳ። 5 ጌዴ ዳሬዛ ገዶ ጌሊዳ ማላ ኢሲ ቦሳ ማይያ ማይዒዳ ፓንሳ ኡሻቻ ባጋራ ኡቲዳይሳ ቤዩዲ ዳጋሚዳ።
 6 ኢዚ ቃስ ኢሰታሰ “ዳጋሞፍቲ! ኢንቲ ካቁቲዳ ናዚሬቲ ዩሱሳ ኮዩታ፤ ኢዚ ዳንዲዳስ ሃን ዳና፤ ኢሰቲ ኢዛ ዎሊዳሶ ሃይሳ ቤይቲ። 7 ገዶ ኣቲን ኢንቲ ቢዲ ኢዛ ካሊዛይታሲኔ ጰፅርሳሰ ካሴ ኢንቲሰ ዮቲዳ ማላ ኢንቲፌ ካሴቲዲ ኢዚ ጋሊላ ባና። ኢንቲ ኢዛ ህን ዳማና ገዲ ኢሰታሰ ዮቲቲ” ገዳስ። *
 8 ማጫሳቲካ ማላሌቲሼኔ ኮኮርሼ ዳፋፔ ኬዚ ባቃቲዳ። ባቢዳ ገሽ ኦናሰካ ኣይኮካ ቃቲቤቴና። *

* 16:7 ማቶ 26:32፤ ግር 14:28 * 16:8 ኢሲ ኢሲ ቤኒ ገሻ ማፃፋታን ፓይዶ ኦሰፑናፔ ጉዬ ዲዛ ቆፋይ ሃይሳፌ ካሊዲ ፃፊቲዳስ። ማጫሳቲ ጰፅርሳኮኒ ባ ላጌታኮ ቢዲ ከታንቻዚ ኢሰታሰ ዮቲዳይሳ ኡባ ኢሰታሰ ዮቲዳ። ሄሳፌ ጉዬ ዩሱሲ ኣሺዛ ላሜቶንታ ገሻ ሚሺራቾ ቃላ ኣዎ ኦርሼይ ሞኪዛሶፔ ዉሊዛሶ ጋካናሰ ባና ካሊዛ ታማራታ ባጋራ ከቲዳስ።

9 ሳማንታፊ ኮይሮ ጋላስ ዋጋ ዋንታ ማላደራ ኢዚ ሃይቆፔ ደንዲዳፔ ጉዬ ዩሱሲ ኢዚፔ ላፑን ዳይዳንሉ ከሲዳ ማግዳሌ ማራሚስ ኮይሮ ቤተዳሰ። † 10 ኢዛካ ባዳ ካሴ ኢዛራ ዲዛይቲ ካዮተሼኔ ዩኪሼ ዲሺን ዳማዳ ዮታዲሰ። 11 ኢስቲ ዩሱሲ ፓፃ ዲዛይሳኔ ኢዛ ታ ዩሱሳ ቤያዲሰ ገዳይሳ ሲይዲ ኣማንቤቴና።

ዩሱሲ ባና ካሊዛ ናምዓታስ ቤተዳሰ (ሉቃ 24:13-35)

12 ሄሳፌ ጉዬ ኢዛ ካሊዛይታፔ ናምዓቲ ጌዴ ዳሬ ጋርስ ቢሺን ዩሱሲ ኢስታስ ሃራ ኣስ ሚሳቲ ቤተዳሰ። 13 ኢስቲካ ሲሚዲ ሄሳ ኢዛ ካሊዛይታፔ ኣቲዳይታስ ዮቲዳ። ገዶ ኣቲን ኢዛ ካሊዛይቲ ሲይዲ ኣማንቤቴና።

ዩሱሲ ባና ካሊዛ ታማኔ ኢሲኔታስ ቤተዳሰ

(ማፍ 28:16-20፤ ሉቃ 24:36-49፤ ዮሃ 20:19-23፤ ሃዋ 1:6-8)

14 ሄሳፌ ጉዬ ታማኔ ኢሲኔቲ ማዳ ቦላ ዲሺን ዩሱሲ ኢስታስ ቆንጨዳሰ። ኢዚ ሃይቆፔ ዳንዲን ኢዛ ቤዩዳ ኣሳቲ ኢስታስ ዮቲን ሲይዲ ኣማኖንታ ኣገዳ ገሽ ኢስታስ ኣማኖይ ባይንዳይሳኔ ኢስታ ዋዝና ሙሜቴላ ገሽ ኢስታ ቦሪዳሰ። 15 ኢስታሲካ “ኣላሜ ኡባሶ ቤቲ፣ ሚሺራቾ ቃላ ሜዴቴላ ኡባሶ ሳባኪቴ። * 16 ኣማንዳይኔ ፃማቂቲዳይ ኣታና። ኣማኖንታይ ገዲኮ ፒርዳታና። 17 ታና ኣማኒዛይታ ሃይቲ ማላታቲ ካላና። ኢስቲ ታ ሱንላን ዳይዳንላታ ከሳና፣ ኦራላ ቃላንካ ሃሳያና። 18 ኢስቲ ሾሻታ ባ ኩሼራ ኦይካና፤ ዋዲዛ ማርዜ ኡዩኮካ ኢስታ ቆሄና። ባ ኩሼ ሃርጋንቻታ ቦላ ዋሊ ዋሲኮ ሃርጋንቻቲ ፓፃና” ገዳሰ።

ዩሱሲ ፑዴ ሳሎ ቢዳሰ (ሉቃ 24:50-53፤ ሃዋ 1:9-11)

19 ጎዳ ዩሱሲ ሄሳ ዮቲዳፔ ጉዬ ፑዴ ሳሎ ዳንዲ ቢዲ ፆሳ ኡሻቻን ኡቲዳሰ። 20 ኢዛ ካሊዛይቲ ሄሳፌ ከዚዲ ኡባሶን ኣዲ ኣዲ ሳባኪዳ። ጎዳይካ ኢስታራ ኦሊዳሰ። ኢስታ ቲሚርቴዛ ኤኪዲ ኦሊዛይታስ ባ ዮቲዳ ቃላካ ማላታ ኦሊ ኦሊ ሚንሊዳሰ።

† 16:9 ኢሲ ኢሲ ቢርሼላታኒኔ ኢሲ ኢሲ ሃራይታፔ ዳቂቲዳ ጌሻ ማፃፋታን ፓይዶ 9-20 ጋካናስ ዲዛ ቆፋይ ያፌቲቤና። * 16:15 ሃዋ 1:8

ኑራሳ ጩቆ ማፃፋ ንሞሉ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
dffa0cbb-5f77-5875-bf95-f4176677af45